


尊齋室詩話

庚辰嘉平月  
張燕昌


















尊瓠室詩話卷一

鶴柴山人陳詩撰

臨桂陳蓮史殿撰

繼昌

文恭公宏謀元孫也嘉慶庚辰會試出吾皖黃

左田宗伯

鉞

門下既登第遂以三元嘉話與乾隆時吳縣錢湘舄閣學

榮

頤頡名天下官至江西直隸布政致仕歸而其詩獨未得見近者北

流陳柱尊教授

杜

抄示數篇珍逾拱璧錄存于此題號征望華圖爲張

東崖先生作云我入秦關西復東馬前萬朶青芙蓉一拜那許七日戀

王程秋潦泥塗封

壬午

典試關中

有登華之約以秋霖浹旬不果

少陵尋源句已澀希

夷有夢神爲通皇華使者後入載

東崖

翁自楚北轉甘州道出陝西爲戊子之夏

日星河嶽

羅心胸當頭壁立五千仞樓指程遙百二重瀑下濺衣塵不浣雲開立

馬風其雄仙骨豈必探玉井巨靈擘畫歸掌中壯懷慣補造化缺振筆

一掃成三峯清獻隨身伴老鶴子先到處驂茅龍竭來陶廬賦歸隱懸

之四壁光熊熊令我對卷憶疇昔臥游當與宗測同家山蠟屐今徧否

敢攜壺榼常相從送葉芸士歸滄州云我游五羊如山僧終日閉關惟

枕肱閉關不得謝衆客冬烘頭腦常曹騰君兩三日輒一見新交却賴



相糾繩似乎遠山倍蘊藉瘦骨逼視殊峻嶒人生孝友是本計心跡彷彿辛次膺我有昆季別三地恃此不遣愁思增竭來南北逼憂患世事覷破如春冰家口萬里問醫藥書到欲啟先嗟矜兩載硯耕聊復爾倦馬未許逃繳贈馬齒相長僅一紀霜鬢入鏡髮且髻君身喜未逮塵障海門摩舉秋空鷹胡爲瑣瑣戀姻婭春泥插脚牽頑藤此行端歸計最得朝看萊綵宵青燈灑不入溜橘未枳留得眞面誰云憎書香政譜富衣鉢風雷之象觀所恆柳條一折不足惜謝家池夢神常凝簪盍萍聚亦咫尺但恨不共扁舟乘珠江欲漲魚鱗興雙槳劃破春波澄山程更歷鄒與滕殷勤請駐車較轆片言爲我致弱弟秋來買布縫行滕穗垣長壽寺池上錢葉芸士歸省滄州云當寒不寒珠江春欲雨不雨愁煞人將去未去杯幾巡作客送客吾一身今歲花朝送歸懼明歲花朝看燕嬌生憎楊柳同兒嬉且聽鐘魚宣佛號萬事去如赴壑蛇堂前萱草非空花勸君勿再輕離別游子經年盼到家暝色催人且小立離心得五喜心十自歎身如池上萍風南風北爲誰急舟泊長沙訪陳蔭堂同年賦贈四首錄一云野鶴避城郭病馬苦羈絆買舟如還家兩旬不登

岸冬山已酣睡衰草時凌亂灘遠水漸闊舉目得壯觀一編聊自娛破  
袂不離案饕餮逼晝短幾欲併手爨舟子貪行程日走夜之半寒月鋪  
平波光逐雙艚散颯然燈火鬧隱隱見閭閻睠言懷故人三載共家難  
許小琴文深以左田師詠南唐古梅圖卷見示余亦適奉師寄簡因次

韻題卷後並寄蕪湖句云今年客羅浮硯田守清凍寂寞文字緣謝絕

市闐開尺書來深冬千里儼陪從爲言腰脚健吟興老彌縱又云許劭

時在座一卷出鄭重獨鶴吟古梅羣鳥噤新呀孤高義不辱片語耐百

諷師詠梅有孤高畏人知義不辱玩弄之句諸作清深閒遠多近宋人柱尊能駢散文及詩

有和張豫泉先生其淦新居句云嗜學且欣書有屋倒懸真歎國無人

西江甘海樵之伋秀才爲莊恪公汝來之孫性謙抑工詩文與吳蘭雪

嵩梁刺史爲總角交有題蘭雪新田十憶圖十絕之二云幾曲清流恰

到門白鷗箇箇點溪痕一天詩夢渾無着直看芙蓉過別村殘霞如綺

散遙天驅犢人歸帶暮烟不解官商自陶寫一枝黃笛晚風前意態閒

逸似北宋名家著有荆香齋詩草四卷

壽州孫不菴明經克依家世素封性耽泉石讀書稽古謳吟不倦有典



有則遐追古賢姚惜抱周海樵序其詩皆極稱之尤敦縞紵之誼同時  
游好則滁州張竹軒天長程禹山蒙城趙地山合肥蔡石瓢吳菊坡及  
同里蕭雪蕉是也嘉慶丁卯年逾艾矣以事繫皖江獄經年謫戍閩南  
將樂縣古鏞州也壬申赦歸壽至六十許自編所作詩文爲湘雪軒集  
凡四卷其子目曰南游曰息影曰煤餘曰抱秋其子裕祖邁祖樹徵等  
爲刊之肥上施墨癡桂庭爲之圖象其神湛然所謂誠中形外者也余  
偶購得舊本茲錄其善哉行云冬雷不硃磴夏雪不搏封攬衣登日觀  
雲氣何容容仙人假羽翼超遙棲鴻濛遺我一丸藥攜歸療羣蒙大善  
不自私萬彙均和融咄哉拘墟士戚威擾心胸讀謝康樂游山諸詩漫  
賦云撫化內無障敦好境不渝運往意已逝情深理茲儲秉職自息競  
緬奇誰同娛狀險發天性淪靈歸泊如願遂事多曠語恆神獨腴如何  
初節乖徒傷末路超學淺幾乏審識移守乃疎欺己道終毀撥本才成  
愚微尙鑒古蹟範履懲歧塗雖未素抱失屢悵觀物虛山水樂遺精追  
琢形襲麤味質遜超詣掩卷滋歎吁題合肥明府沙獻如先生點蒼山  
人詩集後云杜陵志稷契道州重官司緬維兩君子非但誇浮辭胸臆



有約結輪困不自持公詩異今製刻屈工芟夷選理信精熟性情尤所  
資滇南家萬里薄宦遠別離側聞清貧甚高堂仍苦饑養志蚤能厲封  
鮓亦已遲深人無淺語一一肝鬲披雜誦益珍重瓣香專在茲贈周海

樵

大槐

云朔長苦饑侏儒飽古來才士命顛倒知己相逢樂及時安能

鬱鬱向蒼昊君生蚤識瑯琊稻四部七略資探討蒼水使者貽奇編把  
讀過日不知老文章格正斥澀體儷花鬬葉厭虛巧思動鬼神出怪駭

驅濤湧雲涵海島赤手搏蛇騎生馬玉珮瓊琚美且好望溪義法梅崖

筆

閩中朱梅崖先生善古文

二者兼善更獨造近來海內誰同工馮公筆陣千人掃

五

謂全椒馮先生

賦詩力大更矯變香象渡河龍尾掉齊梁綺靡鍾譚衰蟬噪

蟲鳴焉足道子雲草元自信深茂先博物賞音少但見臥雪斷炊烟那

有匹絹酬辭藻前年予游金斗城逢君一笑肝膽傾膠漆投合異浮薄

雲龍徵逐無嫌憎今年坐予息影軒高歌意氣軒乾坤辨難往往面共

赤尋繹得得思轉新軒前斲扁一丈六妙文揮灑落烟雲

君爲余作君息影軒記

濡大筆予擊節三百年來見斯人文成痛飲夜達晨燈花亂落鳥啼春  
眼前快意萬事足逢歡未應嗟沈淪君胡忽生仲翔感苦說舊恨今初

伸知君傀儡消未盡鳳凰棲枳常艱辛君不見阮籍哭何益屈平醒孰

親世路坎珂一身在文字契合千秋真爲君洗盞更滿酌長鯨吸川波

瀾翻平生嘉會似此寡况茲白首情彌敦百年三萬六千日日日與君

陳清樽寄張竹軒

葆光

望江云老死不死償古愁欲歸不歸搏今憂醉

謳激越凌越謳詩囚苦楚矜楚囚

我去冬竹軒探我于宣城

羈雷曹也他何尤旁睨

內愁箴衆咻仰空嗟咄翻不留雷岸魂來依舒州大江風立濤成邱捶

夢散卻誰傳郵榛林饑窘飛禿鶯

蔡石瓢往謁師荔扉先生兼訪竹軒

聲匹鳳噉殊啁啾

遠慕赤松從遨遊徵逐黃鵠求其儔一鳴一和三千秋食餐啼語誠可

羞沈吟勞思哀沉幽波盪何以安驚鷗龍鍾往歷閩海陬鯨噴鯨難

息偷霹靂殷發琴響流魑魅影遯含沙收莫厭迴腸歌遞稠曲終人渺

乾坤浮贈蒙城趙孝廉地山卽酬其見贈之作云我昔誦君淮樓詩樓

高勢壓九華低

蕭雪蕉曾持君詩一卷見示有淮南第一樓勢壓九華低句

建安風骨故道上綺靡

不數梁與齊前年吾兄壽七十君文大筆濡淋漓老鶴一鳴啁晰息喬

嶽雄據培塿歎今年我復枉酬贈光綴金薤琳瑯垂逸氣天馬不受勒

曠懷仙客相與期感君愛君與君好憐君才大身潦倒歲歲飄零辱泥

塗有似美玉埋蓬葆披榛除菅誰爲功含景匿曜荆棘中堪嗤鄭人寶  
鼠腊舌敝無自呼頑聾依然據案百紙盡古來若箇俊能忍但教一吐  
胸中奇何論磊磊與泯泯吁嗟乎文奇數奇無良遭天豈有意窘賢豪  
君不見肥東潁西周與甯炊竈無烟長寒號

合肥周海樵阜陵甯裕村皆善古文喬於遇

太

湖行云西湖水溉海昌穀餘波入海潛洄狀太湖水灌東吳田湖大勢  
與東海連今年湖漲如翻海洞庭疑失胥口改泛舟弔古空茫茫何處  
水犀軍尙在是日天晴無雲蒸一縷雲忽湖心升東來片雲陰乍合迷  
漫四布黝層層須臾湖昏不見日霹靂一聲兩龍出飛據東西洞庭腰  
蛟螭躩踞行相鑿鱗甲百萬挾流電電激風顛颺颺交風聲雨聲鏗戈  
矛老蛟助擊魚鼈逃格急水立穿雲高穹隆萬丈騰怒濤我舟浮在怒  
濤上俯視兩龍鰓鱗樣洞庭微失蠻觸分兩龍氣作蝸涎腥笑憶當年  
越吳戰纖塵點地徒紛紜復一霹靂風雨止我舟墮落萬丈底波恬雲  
散羣峯妍眉嫵想像醉西子長年告余湖災頻湖龍海龍常鬪爭有時  
海龍湧沙塞海口湖龍噴水衝沙沙不走水溢淹沒民田空苦饑年多  
樂豐偶我聞龍施靈雨滋田疇奚爲恂恂令民愁吳田利存舊溝洫資



湖還憂湖倒流導湖歸海路淤滯誰能仿古疏下游古制難復災難弭  
今知神意非人謀采藻莫龍祠祝龍勿驕悍共佐帝功澤黔黎風波不  
興永清晏亦如西湖平淺流但有水利無水患題蕭雪蕉寄舫軒云小  
築三間遠市塵朝朝料理苦吟身室能容膝原非陋壁可題詩未是貧  
茗荈時堪招好事雞豚聊足供比鄰軒車若出宜春里金石聲中識有  
人

壽州蕭雪蕉秀才<sup>有詩名嘉慶時惜抱老人與之未相識見其所作而</sup>  
篤好之不菴散人亦贈詩曰詩人有東野白社願低頭可謂推崇極矣  
蕭詩予未得見不菴抱秋集中有壽蒙城蘇虛谷前輩九十詩注曰蘇  
公前贈詩有八公山色翠嬾娟句佳作也蘇曾官合肥訓導善繪山水  
松竹

定遠方蓮舫先生

士詮

與弟調臣學博

士翥

俱能詩先生于道光庚辰

官湖州守後因公墾誤遠戍伊犁戊子賜環有丙戌過涼州贈程憩棠

贊采

太守

按太守後改名撫  
采官至安徽巡撫

云長空雨洗萬山秋隴水淒清繞郭流香

案詞華傳令史雄疆聲望冠諸侯書生也許參戎馬劍氣真堪射斗牛

獨惜我勞歸未得天涯還喜識荊州題陳夢湖

廷桂

先生典試滇南詩

卷凌瘦生所藏云曾依絳帳楚江濱展卷如逢座上春萬里星河勞遠夢十年身世感秋蘋詩留炎徼聲逾壯人到林泉樂最真今日憑君還寄語爲言張翰飽鱸蓴前篇雄健此篇和雅蘋韻一聯頗似唐人辭府主詩萬里家山歸養志十年門館受恩身眞所謂文生於情者公之立身可以見矣李忠定公印歌用昌黎石鼓歌韻七古序云篆文尙書右丞親征行營使李綱印旁鐫靖康元年勅賜壽州孫欽生所藏詩云忠定李公有遺印飲生家醇示我屬我歌南渡業已棄淮汴拈韻誰克希陰何印方四面一寸許字體柳脚兼虞戈靖康元年紀勅賜玉石光澤疇琢磨親征行營名號壯紅泥摹勒宜輕羅公之聲名儼趙鼎立朝丰采成峨峨奈何大廷失其政權奸盜竊持太阿此印直可擬鐵券寶器定有神鬼呵花石朶民力竭撫字安得循南訛公登進士隸邵武釋褐曾瞻孔壁蝌鱗鳳在郊應時瑞鈞天廣樂鼓靈鼉提舉安置屢顛蹶龜山悵望手無柯作相僅能七十日斜陽返照如織梭駭絕魏公出蜚語此老行事豈委佗况復金牌召良將之水而外僅曹娥回首中原半

淪喪傷哉漢廣江之沱却溯我公策仕初早在政和與宣和陳東搥鼓  
訴公屈罹辟誰實司其科歐陽澈戮倍慘酷善類漸滅何其多和議已  
成甘忍辱會見荆棘埋銅駝此印無乃竟虛設三湘八閩勞經過人生  
精力自有限奚堪既切仍復磋尤恨伯彥與潛善更工讒譖興風波公  
竄南荒不許赦刑章國典眞偏頗宵小鬼蜮緣底事全軀保室匪有佗  
建炎當宁覲人面用人行政誠煥炯遐想我公當此境抑塞無語空摩  
挲君從何處得此印助我酒興長吟哦好將搢本慎藏弃譬如名帖珍  
羣鴝鵒之史傳數百載流光瞥去洵剝那彼蒼夢夢信難測獨使賢傑  
遭坎軻公之精爽寄斯印應懸霄漢凌山河題詩願和石鼓韻敢云學  
步翻蹉跎論斷暢達似東坡先生卒于咸豐元年壽六十六著有啖蔗  
軒詩集三卷哲嗣濬頤以甲辰翰林外簡兩廣鹽運使爲刻于粵中先  
生第三弟芝山茂才士衡亦能詩有咏投壺句云鐔鐔矢聲疾衆耦互  
升降簡鍊可誦濬頤字飲茗號子箴乙未京兆舉人登第時年三十亦  
能詩有家風茲錄其省學博叔父于東流同作菊江淵明  
因名菊江雜咏二  
首云峨峨銅佛閣密蔭擁沙墩浩浩清湖水分流到寺門慈悲心早覺



覺心

自在默無言絕頂凝眸望渾如鳳翼騫又永晝耽閒靜空齋兀坐

時論文差免俗學字未嫌遲

學博叔善書法

豈有尋花興曾無飲酒詩角聲淒

欲斷鄉夢水天涯并錄于此以存一家之言

詩案先祖菊生公以鯉尹宦粵與子箴都轉同時頗

荷知遇

蓮舫太守又有追懷合肥畫師施墨癡詩云下筆欲追吳道子前身合是李公麟自註壽州孫陶圃有四十賢人圖乃墨翁得意之作墨癡既沒其子小癡爲先生繪啖蔗圖先生贈詩云小米臨池有父風墨癡名桂庭小癡名森柏墨癡嘗爲孫不菴先生畫像刊於詩集神采奕奕小癡能詩光緒初年尙存

方調臣學博蓮舫太守仲弟也研經工文以優貢官太湖東流教諭殫

心教士多登科者如太湖趙太史

昀

東流江孝廉

映樓道光己酉中式

皆是也咸

豐初擢署潁州教授因亂未赴任多公

隆阿

統兵至皖檄辦壽州鳳臺

團練丁巳二月賊攻壽城堅守十餘日圍解積勞成疾仲夏病卒年五

十五先生耽吟咏篤于兄弟當伯兄赴戍每賦詩懷之時杭州顧受笙

茂才

均館其家和詩有有酒得依金谷例看花翻憶玉關人句蓋紀實

也所著四持軒集如題趙生晉生

暖

帖存

明

兄弟西窗共詠圖云三間

瓦屋判西東二陸才華出此中家世本來金鼎重

二生

撰之皆介山

清心期

與玉壺同丸成猶記分韓母臚唱端應到宋公夜半書聲聽不斷聯牀

風雨一燈紅菊江

即東流

雜咏云地僻居民少城荒樹木繁浴波翻水鳥

歸市剩河豚亦有人呼渡曾無吏候門清風吹滿座獨自倒芳尊二詩

清切厚重似香山放翁語云言爲心聲信哉先生哲嗣濬師字子嚴咸

豐癸卯舉人以內閣中書官至肇羅道先生有四持書屋觀蓮圖詩趙

帖存編修寄和有云十二年來見未能離蹤長託玉壺冰開槭宛近春

風座問字回思雪夜燈附錄於此亦龍華會上一段公案也

道光乙巳秋暮蓮舫先生里居聞林少穆制府在新疆戍所奉旨來京

以四五品京堂候補喜而賦寄二律少穆制府和之云輪蹄未息鬢毛

斑始願惟期入玉關垂老重嗤貼上竹報恩祇學雀銜環三邊到處都

留月萬里歸來飽看山漫記泥痕鴻爪在倦飛早似鳥知還其二林園

蒼鬱竹枝斑小隱知君靜掩關顧渚茶香澆塊壘虞墩麥飯弔珠環

定遠

有虞

家傳燕許新簪筆

謂長君飲

心薄巢由舊買山何日春明扶杖過

相看兒輩早朝還二詩雍容大雅具見名臣風度

全椒黃琴士廣文

典五

乃李申耆門人客淮上與蓮舫先生頗相賡唱

有咏雪詩四疊東坡聚星堂韻和蓮翁云不學老儒烹匏葉終日吟哦

一卷雪絀幽關險語盤空狂歌大笑冠纓絕方干能詩復善書屋漏痕

兼釵股折年來著作等身成雄心那許名磨滅老我書城作蠹魚百不

如人甘肘掣胸中磊塊酒杯澆世態炎涼消醉顚笑他俗子競錐刀手

數青錢亦瑣屑

鄭嶠詩青錢瑣屑安足數

積霰連朝苦未晴繁雲歷亂隨風瞥多少

窮民鴻雁嗷陳規吾服晏嬰說安得大裘千萬丈廣被陽春起寒鐵

丁叔雅部郎

惠康

之喚回三戶作殷頑與文芸閣學士

廷式

之無分麻

鞋迎道左收京還望李西平皆所謂身在江湖心存魏闕者也

庚子秋予游滬文學士見余詩有黃鐘牛鐸之知余因獻詩有神山風

雨走孤鸞句公極賞之偶予赴吳淞視弟數日不見則函訊吳北山師

曰陳子言詩人尙留滬否公嘗以榜眼典癸巳恩科江南鄉試而于門

生獨愛蘇州汪甘卿

鍾霖

甯國徐積餘

乃昌

二人余以一布衣乃得預

其列每思曠昔曷能去懷公詩初以典麗勝晚則喜效皮陸境爲之也



茲錄其贈北山師一律云久停諫舌寫春愁屈子騷心往不收國事與  
誰論出處將門如汝最風流朝衣典盡天方雪寶劍鳴時氣欲秋惆悵  
玉龍無主日斜陽黯黯獨登樓山居五排六十四韻乃癸卯歲暮萍鄉  
里居之作摘錄警句云息影巖阿足消閒事事佳橐天符柱史膠日命  
靈媧又野游來廣莫代謝紀無懷瀟灑華陽帽優游闕里鞵基圍重布  
子劍解與添差又棲峻捫蘿徑循流泛荻簿凝陰羣象肅吹律八音諧  
又龜供特健藥鹿繫放生牌又松高疑倚岱橘老漫逾淮萬竹青竿亞  
雙檉紫穗挨臺深南越桂蟻聚北宮槐學種莊生瓠還移孔墓楷又汲  
黯狂猶昔劉伶醉可埋華胥前聖國阿閼化人階又素髮俄垂領朱門  
肯乞腴脩然煮白石甯要佩青綈寄興述懷允稱博奧學士甚愛張園  
風物每至輒喟曰我輩來看春風庚子後屏居滬濱與知舊語輒歎曰  
我與安期生同游洛水蓋借麻姑語謂三見滄桑言際隱然有貞元朝  
士已無多之慨著有雲起軒詞稿宗法蘇辛摘辭華贍積餘觀察爲梓  
行于世

文公達大令

永譽

乃同光間高廉道樹臣觀察

星瑞

之孫芸閣學士之

子累世以詩名君聰慧早歲游庠克繼其緒余識君于滬年方弱冠揮翰若流亦駢亦散以貧故館穀四方凡三十餘載共和癸酉仲春晦日以中風疾卒于滬年五十二有二女無子余與君夙有苔岑之契輯綴遺文梓之署曰天倪室集從君舊名也茲錄七律一首廣州光孝寺有訶子樹四株數百年物也余童時家鄰寺旁嘗嬉戲樹下丙午十一月重至覩樹感作云迢遞訶林百尺枝簾錢此下憶兒時亭亭四蔭還如蓋髣髴雙髻易變絲欲數牟尼成大覺一攀青幹慰遐思平生儘有芳華感歲晏重來索語誰風致楚楚彌近元人君所著筆記有扶桑非日本說頗疑此樹產於澳洲後余於甲戌歲購得縣州李墨莊編修鼎元師竹齋集言嘉慶庚申夏出使琉球見扶桑樹惜君已逝不獲共證然君遇事考核不肯貿然徇人亦具見家學淵源有自矣按李詩有咏扶桑一絕云甘同木槿爭朝暮不與祥桑管廢興球地有花開四季讓他長占佛前燈自注云扶桑樹葉與桑無異可飼蠶花而不堪朝開暮落一名佛桑千葉者有大紅淡紅黃諸色單葉則惟大紅一種單者蕊高出瓣外寸許如燭承盤狀故亦名照殿紅千葉者瓣作重臺蕊藏不見

謝時皆卷瓣如燭而後落四時皆花六月尤盛俗以槿爲佛桑葉不類未爲得實也據此則其花迎日而開與古語日出樹間闔合

近偶檢敝簾又得公達舊作觀報一首乃天倪集所遺之作補錄於此詩云春意蘇人墨硯和閒窗短几樂編摩牡丹北勝徒廋語玫瑰兵連總奈何信有泰山亡玉馬不緣遼海貢天鵝江頭策馬長捐涕采采芙蓉亂葉多時辛丑暮春君方弱冠羈滬命意溫潤摘辭博雅不愧名父之子玫瑰句用歐諺蓋其時聯軍據京津也

醴泉宋芝棟侍御

伯魯

襟度和藹戊戌以黨案罣誤居滬五載嘗游石

湖繪石湖圖贈余且系以詩云越來溪畔水曲折到盤門樓榭今何處蒼茫落日昏山光茶磨嶼帆影石湖村亦欲營茅屋生平孰共論壬寅歸秦改號芝田伊犁長少白將軍庚聘修新疆志留數載返辛亥夏余上隴時介紹俞恪士提學過其家猶是明朝老屋小有園亭酌酒池上而別公善養生神清貌腴猶似中年人滄桑後一爲都門議員而歸以辛未初秋卒年七十九

安吉吳倉石大令

俊卿

性通脫善篆草山水花卉尤工鐵筆時謂可繼



趙搗叔服官吳中署安東令一月去著有缶廬詩鈔文芸閣學士見之  
評爲清冷錄其答盧梧生云掩水門虛設談山客寡儔屋和秋共老愁  
與髮爲讐得句喜三日假書盈一樓家風演茶量兩腋聽聽聽嚴家橋  
寫望云冬十二月春雁啼嚴橋行色晚淒淒潮枯斗勺量溝水地僻蒲  
蘆損菜畦循例殺羊村賽社隔窗游鬼塚穿堤經霜楊柳還嬾眼寶瑟  
明珠向浦西對酒云燈昏未昏晨鐘撞月落不落橫紙窗我歌寂寞少  
人聽擬抱銅琶彈過江共和丁卯仲冬卒年八十四

宋燕生徵君

恕

原名存禮後又改名衡號平子溫州平陽人爲瑞安孫

渠田侍郎之壻幼貧困賴孫公獎拔教誨終成名士己亥客滬列名正  
氣會庚子余到滬始相識君出言有章狷潔成性爲人題詩輒署浙東  
屏絕俗稱後張楚寶觀察創辦濟南大學聘爲文學總教授君每寒假  
歸過滬輒相往還傾談不倦余錄君詩甚多君素清臞客中有疾醫用  
電氣治愈遂容貌豐腴而內虛矣既歸瑞安屢病以庚戌正月廿三日  
卒年甫四十有九所著六齋詩文集未梓茲錄其贈孫仲璵五古云東  
髮慕儒俠立言祖虞唐章黼窮蠻域迦陵思樂方樂方在何許沙界阻

難量聞哀未忘情涕淚數霑裳霑裳竟何益徒使形神傷幽巖桐無枝  
濁世麟不祥夢中見玄聖堂上彈清商長跼審其曲欲寫斷人腸吾子  
抱仁術惻然謀梓桑旣陳闢門法復著新民章勳華風久絕洙泗學幾  
亡高明屬昏虐大義詆同康慘慘孤燈暗漫漫秋夜長已矣待來葉勉  
哉守先王仲輿名寶瑄錢塘人乃子綬侍郎

詒經

之仲子少隨宦京師

時官候補戶部郎中僑居滬上辛丑答友五絕云一見吐肝膽知君非  
俗人所嗟生意盡枯木竟難春乙巳游趵突泉云怪絕陰陽炭煎成百  
沸泉伏流能怒發人事竟難然丙午秋晚寄懷陳子言居士云人間尙  
有陳無已覓句蕭然獨閉門安得扶餘王我輩不如詩界闢乾坤又濟  
南名士今多少殘照西風歷下亭信美湖山誰共賦九原難起李滄溟  
古風融會騷選近體兼綜唐宋不忘君國情見乎詞朱古微少宗伯嘗  
與君爲布衣交見其所著卑議論改革時弊諸端歎爲平實薦舉經濟  
特科君以母喪未赴然謁朱公則執門生禮甚恭朱公雖遜謝君於送  
客時必請朱公入門而後去余嘗與同謁親見其事並記於此余題六  
齋明經遺稿云殘照西風歷下亭

君舊

懷人佳句客中聽江東卑議流

傳徧道韞徒教守一經

君女爲陳介石子婦葆其遺集欲全刊之力未能也

歸安朱古微侍郎

祖謀

又號漚尹晚號上彊邨人初爲詩尙鍛鍊繼棄

而爲詞專學夢窗思精語卓自成一家言其彊邨詞集中有埭西山行

偶書調寄阮郎歸云水墟花瀨上彊邨雙谿溜竹分鬢絲供得十年塵

飛泉清角巾

拊瘦策理空綸重尋釣石溫年年含笑待歸人春山清

淨身上彊邨者湖州地名先生自紀其釣游之處也乙巳先生以停科

舉由粵學引疾居滬予始識公公愛予詩頗向人稱道予每有所作輒

呈鑒定有未當字句公必屬自改至可乃去余嘗宴公公賜詞有認舊

隱聞風狂鶴句詞載集中公自言庚子歲將暮李文忠相國到京議和

聯軍要挾三款一兩宮回京二勦拳匪三懲辦罪魁諸人須允始能開

議文忠踟躕不敢上聞吾時官內閣學士因與太常寺少卿河南李擢

英芷香戶科給事中廣西王鵬運幼遐御史江西萬本敦薇生四人同

上疏言事浼桂林劉伯崇殿撰福姚繕寫奏摺劉將懲辦二字改爲正

法辛丑正月兩宮乃有懲辦罪魁之命凡隨侍行在及在京諸人皆正

典刑矣兩宮旣回鑾王引疾李以裁缺皆去萬授泉州守壬寅吾亦以



禮侍出督粵學風流雲散矣

彊邨先生督粵學三年遂致病濕久屏茶經有漁家傲詞云繞榻書籤兼畫幃朦朧散帙何曾竟老去不禁茶力猛微睡醒風爐煎朮供秋病萬里碧雲生雁興行行書破青天影樓月半升簾薄暝闌獨凭商音滿耳無人聽公卒于辛未仲冬年七十五

彊叟有題清道人遺象句云猶能下筆風雷起便與臨觴醒醉難夢想何人到青史收身百計讓黃冠傾吐肝鬲無一懈筆醒醉句謂道人豪于飲啖也

王聘三方伯

乃

四川中江人也光緒庚寅翰林歷官江西撫州守湖

北荆宜施道擢藩司護鄂督篆宣統初年調河南貴州藩司辛亥國變

棄官寓滬以醫自給改號病山又號潛道人善詩詞詩派中和醇正類

權德輿遭際迍邴家人盡逝晚娶合肥方雨人大令

承霽會官  
靖江令

之孤女

爲繼室手鈔前岳母闕德嫺夫人

壽坤

紅韻閣詩文稿欲重梓行以貧

未果也癸酉仲冬病卒於滬年七十三茲錄其立夏前三日憩非園次宗武愔仲昆季唱和韻云幽徑無人雙蝶飛綠陰欲滿紫藤肥暖風啼

鳥留春氣微雨落花沾客衣鄰樹補天圍作幄短牆環野不扃扉閒游  
半日機雲話舉似山陰看竹歸非園在滬北乃粵人甘翰臣處士別墅  
也戊午九日偕彊邨仁先悒仲游焦山第三日赴金陵訪散原先生留  
連四宿而別先生旋有詩至和其韻云延息貪佳游好秋怯夢斷伸眉  
故人書遠佇响濡伴嘯儔美風日江山寫懷滿既棹京口嶼遂駕石城  
館凌雲詩仙居劫後席重煖棟牖天護持園花露漱澣聚歡圖新棕離  
悲述從癩怪君起危疾疊什禿幾管衍賓初試觴富致良醖款移軍張  
吟嬉羣伏老將悍皎皎中天月照見栖鵲卵連夕振吾憊時亦吐恢誕  
哀生焉所逃乾坤此虛竅相期天爲徒奚病人也散願言葆幽姿歲歲  
竹葉盃嘆天霜鶴音希答作陋短

吳展齋與許疑菴有問答詩綽有風趣展齋答疑菴見懷云爲分嵐翠  
上塵裾札寄風樵雪釣餘江路漸開梅到杏濠梁終笑我非魚憂天倚  
杵甯忘世求友同林一起予甚欲尋詩山水窟巖塘煩訊舊家居

余祖居在

巖塘去疑菴僅一舍

疑菴答云良友書來一惘然堂堂白日是何年小人祇解憂

田園無夢能回倚杵天相依壚里各西東老樹清溪處處同君問巖塘

了無別春來都在菜花中

嚴齋問飲中巖塘舊居竟不能對

上海嚴載如處士

昌增

一號畸盒嘗游黃山有謁熊魚山光祿

開元墓

有碣曰明遺民榮菴大師之墓

詩云汀州驚已破殘局挽難回抗疏言都盡披緇志可

哀棄家感禾黍式墓剔蒿萊丞相源頭水精靈共溯洄君篤志文史搜討叢殘輯有海藻一書乃唐宋元明清五朝上海人之詩陳散原先生年踰八旬猶爲作序他日刊成當不脛而走矣

渦陽袁杏南中丞以廩生官至新疆巡撫喜爲詩居淮北勇悍之區肯爲雅歌可謂英傑有過長安故城七絕云山河王氣鎖關中漢武秦皇一世雄坏土未乾宮闕火空留渭水自西東感慨處近中晚國變南歸隱居卒

盟鷗叟嘗作五古四章以肖選體棄去彥師在京師相遇

當是乙未丙申間愛

而錄存既攜歸余又見而錄之茲偶檢敝笥摘錄二首存此其序曰重九後秋氣就盡荒寒洊至游讎之集情於數出將供菊蓄釀寥寥餘秋以獨賞盡之興寄斯託言之無端其一云秋闌意亦減餘懷與落木門前散幽步荒景若村谷余心有義儀匪伊歲時速涼風變原草凜然天



地復如何含生者辛苦相迫蹙羊腸未爲險坤軸將盡縮去去不足言  
愛此西家竹夜歸露氣白珪月照森肅其二云露螢不自生腐草分餘  
輝朽質能幾時生涯爾亦微荒園月初下冉冉流入衣籬蟲警秋寒羨  
爾照獨飛芳菲一以歇薄翼將何依陰陽使之然孰窮來與歸

杜鵑花詩佳者頗鮮光緒中年予在粵見趙宗檀句云也知此去西川  
遠斜立東風未肯飛不卽不離允稱傑作

周彥升先生

家祿

江蘇海門廳人同治中優貢一署丹徒訓導光緒六

年吾邑吳武壯公

長慶

自浦口移屯登州聘爲記室八年壬午朝鮮兵

亂武壯奉朝命率師援朝鮮先生從行航海七日而入漢京執亂首大

院君李昰應

時謀廢國王  
立其次子

送天津幽之盡平亂黨朝鮮事定留防二年

先生賦詩多紀其事甲申正月武壯班師駐奉天金州未幾病卒先生

乃從湖南學政太倉陸文慎公

寶忠

入湘襄校頻年後游武昌爲存古

學堂總教習辛丑冬歸里過滬訪吳彥復師余居師家乃得謁見先生  
性情和藹愛士若渴頗賞余詩有問必告先生詩宗三唐間及樂府各  
體俱善爲光緒時一大名家茲錄其奧移集中詩數首春雨雜興云晝

舫瀟瀟雨初聞二月雷開窗當野水卷幔受殘梅春事花開落溪聲客  
去來漂搖孤壘在巢燕與徘徊偕王比部桐街西賞殘牡丹云勝絕街  
西種珍珠出寶胎無人知愛惜相見在塵埃遲暮翻憐色飄零始惜才  
殷勤千萬意何不在初開立夏云漫天晴絮下斜街帶雨春苔上斷階  
門閉游龍三尺壁啼鶯祇道是空齋衡山雜詩三首絡絲潭云潭盈絲  
亦盈潭涸絲亦涸天下杼軸空巧婦難爲絳上封寺云雪封香積廚風  
撼飢稜鐵倚檻辨湘流東南幾斷袂觀日臺云義馭未臨時燒天作奇  
麗心訝金輪奇不知浮雲蔽壬寅先生赴津門余賦詩贈行先生次韻  
見答云詩是北山詩弟子孔門今日有顏回後潮水逐前潮長下岫雲  
遮上岫來君掣長鯨回碧海我持朽骨上金臺可能身後叢殘集點勘  
終煩大雅才先生卒於宣統己酉冬年六十三哲嗣季誠大令坦滄桑  
後刻壽愷堂遺集遵先生言延余校勘詩文詞聯語凡三十餘卷二載  
乃藏事今季誠又於己卯初冬病逝年甫五十三仁孝無大年可慨也  
有二子之森之淦聞皆能嗣其先業余賦挽詞有仕宦裁溫飽千金刻  
父書長才無廢事衰病得閒居之句讀者可知君之生平矣

貴池劉恭甫

詒詢

遜甫太守弟也遜甫詩已刻於皖雅恭甫詩予未得

見近者崑山趙學南處士

詒琛

見贈畫膚吟一卷則恭甫詩也庚子歲

逝年甫廿四詩效昌谷有足傳者茲錄擣衣五古云涼蟬響夕林熠耀  
征幽館引臥憐孤衾鄰機導愁竅冥冥江海深惻惻夢途短香澤羞鬢  
絲沈燎絕餘煖霜紈疊玉砧繁杵續復斷明漪鑑容華偕景聊自款纖  
腰亦何修攬衣知帶緩君子懷故鄉今夜月輪滿

湘鄉曾重伯太史

廣鈞

文正太傅孫也曩貽環天室詩一冊

宣統二年夏

刊久

置敝簾世亂年衰未遑料理近偶檢視已被鼠嚙追懷疇昔哲人云渺

君卒于己巳秋年六十六

彌復傷懷茲擇佳什完好者錄存於此庚子雜詩五律云

水宿兼風弱舟居似檻猿筍將看衆岫麥秀歎中原山魃休相謔秋花  
與淚繁未知身世事何處更招魂送人秋試七絕云秋陰人病太無聊  
小閣黃昏坐寂寥裁取輕紈疏別恨幾行宮體似南朝又五古斷句磴  
峻水潺湲谷窅煙紛薄山行路已覓水宿澹將夕垂垂熙陽翳曖曖初  
陰積五律斷句簾鉤金屈戌人倚玉闌干魚賤過晨市鴉飛催夕曛王  
孫爭麥飯遺老隔桃花衛文三十乘句踐五千兵又挽座主潘文勤公



祖蔭官至  
大司空

相門遺笏在夫子抱經來七律斷句和李亦元王聘三庚子  
落葉詞賞花夕夕陪銅輦鬪草朝朝費玉錢瀛海生平愁似墨秦陵迴  
望繡成堆重璧招魂傷穆滿漸臺持節召貞妃清明寒食年年憶城郭  
人民事事非醉題多景樓亡國可憐山鳥帝廢臺想像佛狸軍諸作綺  
思巧合不愧湘州才子也又羸鐸未搖岡替戾螺舟先受渡顛當窗紙  
多櫺明不足黃金非瓦注先昏莽蒼三適似餐腹阿育四輪方駕尻鸚  
鵡州弔彌衡云於何相求常子閣彼殆見君衡氣機運典而出以自然  
亦無驕矜之習尤所難也余嘗宴君酒罷飯時僅剩草具君怡然飽啖  
余每思高致而不能忘

山陰俞恪士提學

明震

一號觚齋辛亥春招予上隴宿新安縣見贈五

古云我從洛陽來坦途無百里峨峨見城闕峻陵列屏几車馬亂流渡  
隱隱如浮蠹莫弔古戰場中原事未已風起遠天黃落日淡如水况爲  
行路人茫茫誰遣此須臾日西匿迴光射成紫幻影逐明生饑烏投暗  
止此是古今情悠悠吾與子海藏叟見之謂得杜意公晚號觚菴戊午  
冬卒年五十九著有觚菴詩存已梓哲嗣純字慎修善繪山水

嘉興沈子培先生

會植

光緒季年官皖提學擢藩司護撫篆宣統己酉

夏解組寓滬壬子夏余自隴上歸重晉謁呈紀游草先生贈詩云廬江  
洄倚沼淮水鬱增波市隱江南美輶封塞上過沙深迷赤柳月冷渡黃  
河病客崑崙夢因君發浩歌此詩書扇見賚署款曰鶴柴山人余因倩  
友人徐丹甫鐫爲印章先生卒於壬戌十月年七十三著有海日樓詩  
集

陳散原先生題予隴上草云鬢髮凋疏面目黧莽穿關塞命如絲更彈  
地變天荒淚成就窮邊一卷詩先生嘗誨予曰近人作詩多喜廣博無  
垠每到漫無歸宿處子勿爾宜竭其才力成一家言他日自可永存也  
予終身服膺斯言先生於丁丑八月卒於燕京年八十五有五子能詩  
者師曾彥和彥通三人

沈培老有句云新歲見新月北人思北風頗膾炙人口乃庚子春客鄂  
作時景皇方被幽瀛臺議立儲蓋有爲而言也予嘗聞門人李曉耘言  
昔讀書京師游北海登瀛臺

按即遼時瓊華島

見德宗寢宮尙留杉木榻一黃

緞覆之後數年再往則烏有矣予爰賦杉木榻樂府以紀其事云杉木

榻黃緞茵景皇養痾瀛臺辰自冬徂夏臨水亭石座小憩荷錢新庚子  
立儲乃復出堯幽囚史可讀

閩縣林子有提學

葆恆

一字訥菴戶部侍郎文直公

紹年

之哲嗣也工

詩詞性好游覽有莫干山雜詩三十首茲錄二首云十載經行處重來  
策短筇泉聲林外咽黛色雨餘濃有徑皆穿竹無峯不種松山容依舊  
好祇我已龍鍾又雲影尋常有今朝忽混茫峯隨波上下島矗水中央  
松助濤聲壯風添海氣涼煙銷旋日出遠岫各蒼蒼閒淡處頗近姚合  
溫州趙百辛敎授甬上有修禊句云杯酒直追真率會江山猶似永和  
平具見雅人深致

彊邨先生詩尙奧衍庚子後專力於詞存詩甚少有寄懷遂公一律云  
道喪醉人無謬誤運汙健者亦逡巡羸蛤未用輕陳說龍蠖何嘗有詘  
伸偃蹇一心從匪石迷茫百變故知津幾時壁水澄於鏡纔信桓譚論  
一新似是辛壬之際所作遂公者錢塘夏穗卿州牧別號也穗翁湛深  
佛理素主持行立憲新政

夏穗卿太史

會佑

一號別士光緒庚寅會元選庶吉士散館改禮部主



事旋改外授祁門令擢泗州牧調權廣德辛亥棄官歸旋游京師數年  
卒有出都留別天津諸故人五古云湛湛一樽酒淵淵千卷書蕭蕭兩  
株樹寂寂三間廬微材豈有競卽此亦足娛所嗟時日迫言將戒征車  
征車亦何爲窮達非我圖但恨萬山外朋友日夜疏滔滔浙江水亘古  
不得徐東流到黃海應縈故人居登樓望不見天海搖空虛旋歸對塵  
俗積懣聊一舒侘僚獨就枕夢見游天衢九奏動萬舞熊羆自我涂丘  
聃并千古疇能辨有無此詩紆徐不迫是深於情者讀之如聞穗翁當  
日之談玄理夙喜郭頻伽詩性固相近也



尊瓠室詩話卷二

鶴柴山人陳詩撰

東莞張豫泉太史

其淦

乃學海堂山長陳蘭浦先生之門人工駢文似

徐庾善古近體詩不拘一格于光緒己卯舉於鄉年甫踰冠壬辰中式進士臥病旅邸甲午補殿試選庶常乙未散館丙申選授山西黎城令丁酉春履任視事四載政清人和庚子冬卸事爲撫軍記室辛丑大吏追論教民出境被殺保護不力事罷職歸家居八歲宣統元年晉撫錫良奏請開復納粟爲皖省道員二年春因藩司孚恩病逝提學吳同甲

字博軒高要人

署藩司公署提學使凡四月餘迨新任藩司連甲來吳回提學

任公乃卸事辛亥九月政變赴滬隱居今垂三十載矣刊有夢痕仙館詩集十卷松柏山房駢文四卷近年燬于兵燹余向友人假得閱竟茲錄其女兒香賦序

香爲東莞所產此乃菊坡精舍課題

中二段曰憶夫雲扃壓根烟嶺擢

秀橘島雨歇擢牆風來有美一人亭亭獨立護祇一片樹逾十年土膏結聚水氣消盡霜飮露飽巖暄野淑筍席偶倚重重古苔石欄所憑寸寸春色此女兒香之託迹也既而有美移家羣芳去國穿彼粉剉揉成



角弓色刮塵土痕留斧鑿辭蘿壁而入菽間矚菌官而登簞簞佩雜蘭  
贈淮踰橘良微添獸燄紅雲影搖不須繭縣青氣篆裊昌黎幾困於淑

郁羅隱云貪作馨香此女兒香之振奇也又有庚戌夏大觀亭賞雨記

篇長不錄五律則南岡

在廣州

晚眺云獨立石壁下蒼然苔蘚斑夕陽明

古渡黃葉滿秋山野寺藉雲鎖孤帆帶月還南岡水清淺一掬洗孱顏

七律則漫成云斜日登臨上黨臺春風誰寄嶺頭梅青山笑客不歸去

白髮欺人逐漸來潞子祠邊新草長邵公墩

在東莞

畔野花開眼看萬里

愁無極遣興聊傾濁酒杯七絕則山右雜詩山行云雲覆莓苔一路封

石門舊徑此間通空山明月落花寂時有春流鳴澗中望遠云家書寄

到祇當歸獨上箕山攬落暉嶺表千重萬重樹白雲徒自望依依宿沁

州店云雲山萬疊豁雙眸孤館殘燈照旅愁寫罷家書眠不得沁州城

外月如鉤五言斷句丁酉二月到任黎城云萬山圍一縣小雨入孤城

曉發潞城云雪融漳水遠日出晉山高趙店

在黎城南二十里

云斷橋支碎石

流水帶春冰核桃園夜坐云亂山窮塞主獨客異鄉人七言斷句由學

耕堂至金繩菴晚步云碧水三篙徐穉宅綠雲十笏遠公房咏素馨花

云不借胭脂真絕世卽傳名字已銷魂西湖雜感云葛嶺寺藏雲疊疊

雷峯塔轟雨絲絲早鶯新燕春泥路亂草繁花旅客心己丑姑蘇紀遊

云斜陽短簿祠邊笛暮雨寒山寺裏鐘見蝶云白苗菰中飛故故碧闌

干外立遲遲春日獨居云今朝鴻爪猶留雪明日鶯聲不是春出黎城

郭門云風披潞子祠前草雨潤黎侯墓上花歸隱云歸去願教門樹柳

再來多恐海生桑平湖云多謝東風解人意盡吹春雪作春波潞安雜

詩云最好月明行古道清漳一線柳千條諸作撫景融情自饒杼軸羽

扇風度纘承曲江余久慕名德以無介未得相見己卯歲因友人冒鶴

亭茗會乃識公余有題夢痕仙館詩集一律云夢痕一集話幽燕香石

休徵步木天東莞有桂花石柱清風徐來其香遠聞拭之黃色彌時不減寒家廬江西郭十里大樹岡有萬歷時祖塋東雍間石

碑上角忽生二黃蘗大如錢以中拭之經宿猶作桂花香先太高祖詩池憲訪公旋于乾隆戊辰科登第入翰林里人謂爲吉徵余于光緒初

年歸里掃墓視蘗暈五文參株誇上黨有黎城縣高嶺夙產潞黨參今猶依然拭之芳馨竟日

職按撫有巨蟬萬方烽火逼衰年休官未肯先朝忽題畫能令故友傳

公賈故太何菊朋賢聖功修看獨到文章餘事更精妍公和四首茲摘

錄其二云享帚余珍石寶燕以蠡測海管窺天風詩旌葛知衰世書客

秋蓬感暮年月日品題十倍價雲篇迢遞萬人傳豐碑黃蘚君家瑞我

亦重攀丹桂妍

自注余今歲重賦鹿鳴

又方思取樂莫歌燕魯酒忘憂醉裏天聊

寫庚寅正則字祇題甲子義熙年壽徵蒲節騷人頌

君午節惠詩有葛蒲九節堪爲壽句

春到梅花驛使傳老柏蒼松留本色君詩點綴有餘妍又和年字韻句

云回憶舊游真似夢休詢今日是何年庾信賦多危苦語杜陵詩想中

興年予答詩有和歌已見楊無敵飛將真疑李北平之句公自言族大

人衆冠冕紛綸獨少翰林明清兩朝惟文烈公

家玉

及己而已靈均元

亮委質傾誠盛衰一節洵可濟美矣

寶竹坡少宗伯

廷

著有偶齋詩草茲錄其大考左遷云老娘三十倒綳

兒獻賦金鑾色忸怩中允左遷天有意小臣詩筆近王維此乃由衷之

言詩人之詩也警句五言飛來峯題壁云澗冷泉聲澀雲寒山翠乾下

葦甸云危徑壓流水奇峯帶亂花始登盤山云巖懸樹立空坡削路在

澗寄焦山芥航上人云寒濤截四面無路來紅塵七言送善汝明之鳳

臺云老近生離如死別途窮作客勝居家三月三日游昆明湖云上已

風光宜過雨北方韶景在殘春初夏雨晴云欲落棗花隨雨墮半舒蕉



葉借風開擷秀山房雨中夜坐云濕雲浸樹滴成雨秋氣滿山旋作風  
陶然亭云蘆芽貼地平如草山影黏天薄似烟寫景摠情惟妙惟肖公  
卒于光緒庚寅十一月十一日年五十一

汀州康步崖

詠

竹坡侍郎門人也壬辰成進士授中書宣統庚戌秋余

遇之于京師讀其漫齋詩稿桃村口占云梨花初放杏花殘兩澗清泉  
漱石寒坐笑白雲忙底事出山容易作霖難此出山時作惜有意治術  
世無用之者斷句如東風吹宿草綠意滿汀洲自辭江上月不見嶺頭  
梅積雨鳴春澗陰雲裏亂山峭巖纏積雪枯樹擁寒雲風花臨塞盡雲  
霧出關愁古北口旅舍題壁亂風撩石門積電劃山開密雲道中皆恪守偶齋矩矱

吾邑劉健之丈

體乾

乃文莊公

秉璋

冢嗣以廕生官江蘇道員權湖南

漕稅滄桑後隱居滬濱善談論尤精子部偶一作詩有感舊吟詠翁文

恭公云世業韋平帝者師風雲經濟共相期會昌一品新刊集半是評

碑讀畫詩

戊戌公自書

長策風雲入壯懷

經濟

詠陸文烈中丞

鍾琦

蕭

云山逢危處

平心過路到窮時放膽行

二句君詩

聲聲兩言覘所學男兒端不愧平生二

詩可入史乘文烈詩頗少見賴此得傳文卒于庚午七月年五十八

劉錫之丈

體蕃

乃健之丈從弟光緒癸卯以諸生舉經濟特科宣統初

元官湖北候補道滄桑後隱居於滬積年己卯季秋滬人開語文會所

陳設有貝葉經泉幣諸古物丈約余往觀丈賦詩云西風鳴脫葉窮巷

寡塵事爰邀素心人著屐游海市市樓高五層中列古文字岫嶼神禹

碑焦山瘞鶴誌復有龜甲文可證鐘鼎識貨布與貨泉一一羅形器有

清一代錢想見寶源制最奇貝葉經梵字殊詭異疑從天竺來或是達

摩遺吾儕幸樗散遭亂仍避地收羅恨無力懷古空睥眄歸路踏斜陽

梵鐘搖佛寺余既歸先作此寄之以爲嚆引云久聞釋氏傳金經寫貝

葉羊城昔有此梁僧所手植一名菩提樹移根自天竺

梁天監中天竺僧攜貝多樹植

于廣州北門城內光孝寺

光孝古寺中四株具行列寺僧拾葉浸搗紗與絹匹

拾枯僧

葉溫浸淫搗製成紗曰菩提紗

粵人市寫經嘉慶一火絕

嘉慶二十三年樹燬

余生恨已晚至

老未目擊今逢滬會開層樓聚珍物錫丈吾鄉彥窮巷枉車轍招邀同

往觀不憚共登陟觀紗色棕黃梵字何須識

有貝葉經二幅皆棕黃色頗細織廣僅二寸長盈尺

乾文書直行

更觀古貝製

古幣

狹小而明潔

二具

乃爲朋

周詩錫

清錢公母鉤

乾隆濟直局

乾隆錢背有清文濟局字樣俗呼爲公鉤

局直觀一而得三狂喜類禪悅吾

儕各衰老惟吟暢胸臆願公亦高詠取舍各有得世方嘆無錢

馮市缺錢將半

載矣製貝正可學諧語供一噱不避世人責

歙縣徐丹甫茂才原名受麋後改名識耜字澹甫乃廣州名士鐵生觀

察榮之孫咸豐洪楊之亂徐公爲杭嘉湖道督兵援徽屢捷後于漁亭

戰沒徽人士欽其亮節留葬郡郊子孫守墓遂爲歙人丹甫工詩文精

隸楷善畫梅有祖風僑滬敎授十餘年今年逾八十矣其詩文曰芳燭

心室集許際唐編修爲作序余曾見之簡雅類溫邢君以貧居猶未梓

也茲錄其曾聞一首集李璧碑字云蕃條齊聳秀一葉報先零海日秋

當閣人烟曉入庭披書尋古味作客寶傳經好學文中子曾聞道不形

余尤愛其一花開醜石萬雀樂豐田二語明秀似中唐人又錄其抒志

文一篇序曰偶購得澄清堂殘帖王札數通草書極超逸予性好種植

而無資歸隱乃集以抒志其文曰吾鄉山州也欲求荒丘一二頃平者

極難得若近住宅益不可見求之久懸諸心去冬還里見有水不患無

雨少可經理者但得數畝不足慰吾懷然在此間亦有可喜如辦好竹

名果能遣春秋佳日吾當以家事付諸後人行坐手一杖就陰晴領生



意便安樂耳此文集右軍書便得其閒靜之趣令人百讀不厭

長沙鄭叔進學使

沅

一號習叟甲午探花官至侍讀壬寅典試甘肅己

酉提學四川舉曹鑲蘅爲拔萃貢于朝余贈詩所謂梗楠拔縣竹是也  
滄桑後鬻字於滬有題予皖雅一律云頽波不已鎖愁予天問還應溯  
邃初賴有高人扶大雅忽驚椽筆照幽居桐城文字千秋業淮水動名  
百戰餘分付老儒勤掇拾虹光靜夜亘精廬題凌光庭冰髯雪笠圖句  
云歸人千頃玉取酒一家春甲戌冬以鬻字過勞患右手足偏枯中風  
不語而飲啖仍甚健左手能作書與人酬答如舊今病七載年七十五  
矣每日兀坐觀書不倦大易所謂貞疾養年者也

楊留垞先生以翰林出守蔣州國變後栖隱南北垂三十載矣甲戌初

秋逢先生七秩予賦詩爲壽起四語云先生歸薊北詩話重江南

謂所著雪

續詩

紙價春潮長文心淨域參先生賜詩云相將曾幾載小別已周星

七十今逾歲三緘早作銘詩留寒瘦集語謝短長經風雨淞南路乾坤  
一草亭先一年余賤辰先生集杜句爲楹帖寄贈云清詩近道要空谷  
滯斯人予迂拙無似乃荷名流睠睠可感也已卯殘臘先生有小極初

愈拔可先期饋歲並寄示詩稿定本賦此代簡一律云枝藤閒倚似枯  
僧硯篋慵開已見冰病偶侵人常不藥天徒貧我更何能稱心事少言  
彌簡載酒人來量漸增舊喜讀書今懶讀新篇何意貺良朋拔可其門  
人也庚辰初春先生和予元旦詩云剗地東風欺客夢綠楊眞作兩家  
春蓋謂居滬時寄寓相近也窮居鬻文初秋八日以痢疾卒彌可傷已  
余賦挽歌云酒德溫能克縣山夏亦寒可云實錄

留垞先生晚號聖遺居士以良鄉聖水而名茲又見其己卯庚辰遺稿

題蕭瑟畫云獨立空山雪作堆柴門終日未曾開南鄰酒伴多情甚特  
向寒廳送暖回孫文正師癸亥春闈墨跡云數語終身誦有餘青燈照

壁狀元書低回七十年前事長拜荷衣上學初

師視學湖北先大夫嘗

學欲知則問守身如玉守口如瓶義入學時命懸之書室

澹靜之氣溢于楮墨間先生哲嗣懿諫字

實甫能文傳其家學

長沙饒石頑舍人

智元

一字珊叔余故人也文藻富麗詩宗唐音著有

十國雜事詩明史宮詞皆傳于世余於辛丑壬寅間遇之于滬上君出  
示其湘淥館詩稿余愛而錄存數首一宿河懷黎五錦彝云落日下高

林漠漠寒烟晦空山調素琴相思碧雲外石門關云涼月夢中夢秋雲  
山上山雙珠何處寄迷路石門關閱碧湖吟社詩卷云嘉宴堂前草樹  
漫微風細雨寺鐘寒扁舟今夜昭潭月苦憶高人釋敬安

釋敬安一字寄潭其碧巖

秋宴句云細雨池  
塘晚微風草樹秋

其爲孝廉時嘗與曾重伯孝廉同咏楚南古蹟聯句

茲錄寶露壇云翠帝山裳謁九疑

重

丹姬水珮阻重離空聞寶露埋銀

寶

瑞

不見祥風返桂旗玉琯永辭王母國

重

金莖遙啓漢官儀簫韶峯

下遺弓劍

瑞

松柏長鄰燧氏碑

重

此詩可謂工力悉敵君斷句如人烟

團水驛春雪犯山城十二紅闌雙燕語黃昏微雨更無人均佳君後改  
捐陝西候補道國變後流寓京師甲寅歲以文字觸時忌遇害年五十  
許後害君者亦不得其死而君之冤雪矣豕嗣伯亮能文學惜早逝

清道人者臨川李梅菴太史

瑞清

也光緒乙未庶常未散館改江南候

補道充兩江師範學堂監督累歲宣統三年署江甯提學使九月江藩

樊增祥以時艱委印去江督張公人駿檄君署藩司十一月棄官赴滬

一貧如洗以善寫魏碑爰黃冠隱居賣字爲生庚申秋卒年五十四其

家人刊其遺集而感懷二首效選體者闕如其戚饒石頑嘗錄示余茲



爲補錄於此其一云美人傷遲暮抗袂凌雲翔九州紛總總縹馬觀遐  
荒王母在瑤壚我欲展中腸流沙極千里雷淵不可杭赤螳若巨象壺  
蠶正敷張彷徨無所倚回軻趨朔方朔方常苦寒遶龍絕縱衡積冰山  
峨峨飛雪浩茫茫求仙徒虛辭不如還故鄉藥石駐顏齡反恐多害傷  
愚夫惑神怪君子正厥行勵德苟不懈胡懼外物戕其二云神龍懷奇  
翼乃在靈淵藏常恐歲月晚百卉委風霜噎噎結沈陰白日翳無光烈  
士獨慷慨撫劍觀八方四海揚洪波天地爲低昂憂來如繭絲綿綿方  
未央哀嘯入青雲此曲斷人腸歲寒知松柏世亂須賢良非無萬里翻  
天路阻且長我欲迴陽轡使之復東翔微軀焉足懷君恩不可忘此詩  
戊戌冬作蓋傷心人之言也

按清道人遺集乃江右友人胡幼懷觀察贈余者并記於此

如皋冒鶴亭部郎

廣生

與余三世世交既相識又四十年矣己卯春余

作轉軸歌一篇贈之云君今六七我七六世事翻騰如轉軸登第纔看

東海桑

管于光緒甲午江南海關幾捷

焚書又作荒年穀世誼文壇各有成輪君獨占

少時名摘櫻啖荔歷南北粵海燕山空復情

君與余皆生長于粵東

君和云嗟君

與我逢百六坐視東南傾地軸熟知窮老氣愈昌人日有詩題到穀文

字波瀾晚更成後山吟榻有聲名酒邊却少劉貢父

謂馬生

共話天涯海

角情余讀哲嗣孝魯世兄

名景璠年三十

夜坐詩歎爲佳絕賦贈鶴亭兄聊以

爲賀云舊德門庭毓好春家山離亂未爲貧久聞昨史能充腹難得生  
兒是解人劫外斜川娛晚歲膝間文度號奇珍百年水繪遺風在應有  
歌謠繼後塵附錄孝魯三世兄和默存夜坐韻詩於此虛幌吹燈闌不  
歡流亡道路有饑寒驚鳥繞樹月初暈落葉掃階聲尙乾肝膽向人終  
鬱勃情懷如水自瀰漫無邊夜色歸堅坐哀樂中年損謝安又題觚菴  
詩集絕句云鬱陶天地色悲涼度隴高吟氣益蒼能道羣羊去如水不  
教斛律擅窮荒均雋永可誦

新建夏劍丞觀察

敬觀

一字映菴甲午弱冠舉於鄉光宣間嘗官蘇垣

以提學樊恭煦未到任署提學使兩月余往來蘇滬爲其幕賓將歸稿  
從者英銀二餅其繼配左夫人有文學善詞聞之堅不許僕人受於以

知文襄太傅之以儉德治家夫人特效焉

夫人爲文襄公孫女出于第三房

余猶記偶

逢祀典撫藩學臬皆蒞行禮君班在左子異廉訪

孝同

上廉訪君叔岳

也有不豫之色君後語人曰非敢僭也禮在則然耳爰記之以見當時

故事今郎君承繁叔庶承詩幼達皆左夫人出滄桑後君年五十餘矣  
猶游西秦登華嶽過王猛讀書臺賦詩云達世人誰不見疎貴吾所學  
要深儲何當盡絕浮華士來傍臺前更讀書頗有豪氣歸來繪華山諸  
景鬻於市余贈君詩有養母不求仕畫山能賣錢之句令子幼達善繪  
能繼其家風今歲初夏余七七誕辰幼達繪春山圖爲壽閒澹可喜余  
題詩云夏珪家法尙能攀長日如年未肯閒隱隱烟村一叢樹煩君淡  
冶寫春山幼達和之有七七高年眞矍鑠儼如瀛海見蓬山之句并紀  
之喜故人之有子也

閩縣李拔可太守

宣龔

吾故人也光緒甲午君年十九舉於鄉嘗於丁

未戊申間以司馬權桃源令淮西僻壤也瀕于洪澤地瘠民貧君下車  
爲民籌生計集款設工廠教民以藝俾日用之物有賴無假外求又於  
城濠十里種柳養魚爲他年之利次年春蝗教民驅撲秉畀炎火是歲  
蝗不成災而君行矣甯藩樊樊山嘉之檄署上元令君厭迎送之煩辭  
不赴樊山批牘曰傲不可長君乃去而之他納粟爲湖北知府辛亥夏  
入都旣邁滄桑之變遂隱於滬市近刻生平所爲詩曰碩果亭集而丙



子入蜀諸篇尤戛戛獨造令人讀之若游其際焉茲錄峽行云楚山堅  
重局走蜀儼無路誰開禁門鍵東望塞反顧回風變蕭瑟峽雨慘成霧  
灘形眩旋磨水勢急漂杵又云巫雲十二峯窈窕鸞鳳舉靚妝入明鏡  
倒影更媚嫵峽深積噓吸天遠答修語杜鵑叫蒼壁宿癭滴鍾乳近入  
草木氣赤日不能午導江利用曲捍水在一阻又云夔門雙石闕插江  
畫鴻溝能令出地舟於此迴萬牛夏漲沒豔潏瞿塘誰敢浮江底沉鐵  
鎖眞如扼咽喉其巔白帝城存亡迹空留嘉州道中云抱城綠野與江  
平路入嘉州水更清松氣日光三百里峨眉天半片雲橫夾江卽目云  
萬里岷江洗眼來水田無處起塵埃古榕幾樹棲歸鷺錯認辛夷五月  
開荔支云蜀道何曾聽子規歸心自與水爭馳三更失去烏尤寺卻向  
渝州見荔支

茶陵譚瓶齋處士

澤闕

爲兩廣總督文勤公

鍾麟

季子少孤能立敏慧

夙成游滬二十餘年以詩詞書法名世著有止義齋集茲錄其與友人  
閒話張園舊游兼答楊无恙贈作云張園舊在江壩野十里銅街宜走  
馬淺淺平蕪共賞春脩脩林木還銷夏周廡深廊面圃開傾城空巷出

徘徊一鞭絲影斜。曛過百輩紅妝。袂服來冶葉倡條。隨指點良家豪族。  
多姝變臨階列坐。促花筵。隱几薰香。傳茗盃。此時閒客恣閒游。佳日頻  
來春復秋。品題第六泉中味。評泊無雙譜裏儔。轉燭風光逾二紀。同游  
零落今餘幾。屢聞易主苑池平。俄看彈指樓臺起。自後龍團試點湯。愚  
園徐墅迭興亡。懶逐繁華尋舞榭。厭從囂隘覓閒坊。江壖戰後成甌脫。  
近邑流入水歸壑。談空說有送朝昏。門茗尋詩踐期約。始復相攜過酒  
家。青帘名字指京華。蛾眉親捧頗黎瓊。雀舌初煎霧露芽。吳越猶存舊  
風氣。海南新樣增佳麗。水厄知君定不嫌。茶嬌在眼那辭醉。喜誦新篇  
感舊塵。味莼無復昔年春。縱饒花乳清冷氣。要著瓊枝姪姹人。此篇暢  
述張園盛衰如讀洛陽名園記。感慨處亦近連昌宮詞。又正月十一日  
墨巢爲鄉賢伊墨卿太守作生日招集同觀伊公各種墨蹟句云汀州  
獨解法興祖結體。奧衍蛟龍纏時參篆勢。出碑額鼎彝典重森矛鋌。眞  
書行狎似懷麓橫平豎直無頗偏。又云平生微契在東武。對此沆瀣眞  
拳拳。論書尤精到。非能書人不能爲也。丁丑除夕云冉冉修蛇盡匆匆。  
急景侵暖雲銷臘。雪兵氣沍層陰得歲知。人老看天到陸沉。那能乞如

願謾作送窮吟通篇研鍊似杜斷句五言如渡海云溟滓無四鄰空碧  
蕩千慮丁卯除夕前日大寒節雨云雨凝剛洗歲梅煖欲銷冰夏日云  
杜門知市靜攤卷送杯長七言如乙亥臘月重還塘山路舊居云土龍  
舊住東頭屋子美重歸江外居秋夜樓望云過眼逝波爭去轂妮人涼  
意上疎櫺訪呖厂湖上官舍云廨宇清嚴希客到簿書稠疊當山看李  
十一招飲次韻云知味敢矜三世種傳鯖猶憶五侯鮮均雋逸不羣無  
題云廣樂已憐終七日好花剛許看三春此情除却天邊月舊恨猶輸  
陌上花亦繇邈似飛卿余題其詩集有句云泛艇淞波時代謝謂庚申春從陳  
散原先生暨君與伯葵偕游半淞園泛舟同詠舊事廢園蕪味句紛拏君和云五車書識胸長貯  
一卷詩仍手自拏用韓子蒼詩意殊妙

湘潭袁伯夔部郎

思亮

原字伯揆亦號養菴爲前上海道官至粵督海

觀制府

樹勳

之長君癸卯舉京兆試遂官京師國變後以親在爲時所

迫一出旋歸隱於滬寂居廿餘載劬學工詩詞尤善桐城古文爲陳散  
原先生入室弟子貌豐腴性和厚愛文士若骨肉無貴介習士林稱之  
己卯臘月初十日以喘咳疾卒年六十一是春賦落花詩八首徧徵人



和余亦與焉茲錄其二云惺惺長自惜年芳飛絮游絲並作場不壞眞  
空遺色相難捐結習牘文章殘英尙詎迴風舞委地猶令后土香絕代  
妍華成掩抑等閒贏得一春狂又搖落深知百不辭翻從決絕費然疑  
迴身背面腸堪斷忍淚無言意更悲如此才華終負汝自成馨逸待貽  
誰可憐堂坳餘春在祇有詩人解作癡余和作有覺後羣芳疑證佛夢  
中殘錦已還人之句君大爲擊節往事如昨君遽委化傷哉余羈滬四  
十年所遇居停君與狄楚青居士皆矯矯不羣者也知己之感曷能忘  
懷又癸亥暮春見君詞二闋併錄於此賦庭前落花和瘦碧調寄壽樓  
春云招飄搖花魂有顰烟弄曉怨雨啼昏愁把花枝緘淚斷腸留春芳  
草路憑欄人冷翠裙萋萋王孫悵膩水流脂香泥補壘芳事總成塵  
金鋪掩珠簾曛算情天不老漫注金尊漸看交柯如幄綠陰當門風葉  
戰千人軍笑浪萍浮蹤無根待認取明年香瘢舊痕簪錦巾病起獨游  
半淞園調寄八聲甘州云喚詩魂病起向郊原凭闌洗吟眸正林亭初  
霽濕泥留燕新漲浮鷗碎蕊苔花照眼繡地寫春愁啼鴉年年恨都在  
高樓樓外夕陽斜處有臨風擲笛度水飄謳記紅紅雙曲天際想歌

喉儘半生狂情未換怕絮飛換了鬢邊秋空凝佇亂鴉歸樹綠暗汀洲

桂陽夏午詒榜眼

壽田

於光緒戊戌登第授編修工文善詩予於宣統

庚戌赴金陵陳散原先生約游半山亭乃與君相識後二十二年又遇  
於滬君旋於乙亥七月朔日病卒年六十六余往弔詢其子遺稿則云  
曩日先君隨手拋棄已烏有矣余近檢敝笥得君金陵雜詩三首附錄  
於此以慰故人于九原君詠毗盧寺云耳聞魚山梵眼見魚山寺四百  
八十寺腸斷一蕭字尙無金粉色况有龍虎氣一烟冉冉升一磬徐徐  
墜千佛千碧眼不見鍾陵翠掃葉樓云一琴三百年碎於衣百衲一僧  
抱此琴瘦於松五鬣掃松汲清泉試說花乳法未來雨前焚過去霜下  
葉不白髮泉在山下有不白髮泉白盡不得鐻江南初春誌別云東風疾如馬  
一日綠千里新綠吹上樹舊綠吹入水江海波無窮別意亦如此江南  
有苔地處處印屐齒隔歲落花泥晴來麴塵起數詩天矯不羣是善學  
孟而以清麗勝者余有檢得午詒舊稿感賦一絕云秣陵游宴猶如昨  
歇浦賡酬倍可親愛學寒郊貴公子君乃饒撫菽軒中丞時哲嗣已難遺稿問家人  
蕭山陳根儒糧儲光緒乃無錫薛叔耘星使福成之婿以拔貢納粟爲

江蘇候補道宣統元年署蘇松糧道偶以與族人爭訟細故被議褫職  
國變後羈棲於滬自號贅道人善醫效韓康賣藥自給因余修蕭山志  
述其先世文學遂往來成莫逆交余猶記丁巳寒食日過君寓廬君殷  
殷留食青精飯出示詩稿臨別復送上電車俟車開乃返君旋於己未  
九月病逝年四十九有湘湖晚歸曲云壓音歷烏山頂啼暮鴉跨湖橋下  
散明霞扁舟一櫂且歸去野風水面開蘋花摘辭清逸不減巴渝竹枝  
嘗繹元劉守真溫熱辯作序一篇甚佳他日當刊之靜照軒筆記中君  
大父潤齋先生潤道光丙午舉人與李萼客周昀叔爲友喜爲詩錄其  
中夜云漢影落簷際幽人獨往還夜涼眞似水烟淡欲無山寂寞杯重  
把淒涼月一彎苦吟方未就忘却下柴關清瘦似王右丞讀此可知君  
之家學矣

西園翁有登天平山看紅葉五古云日午木瀆飯飮坐紛魚蝦飢腸易  
爲飽轉歎吳民奢言尋天平山竹輿聲咿啞報以十里夢旣至不覺遐  
十月已向殘風定樹不譁紅葉尙我待餉客千株霞霜力有淺深醉面  
分等差山僧亦隨緣壞色風袈裟人生被眼瞞何止爲霧花秋林豈干



卿還以詩相誇一適了今日歸路隨棲鴉回看樹如薺萬峯爭杈枒此作畫龍點睛自得簡齋神味

寄禪上人

敬安

俗姓黃氏湖南湘潭人住持天童有夢洞庭五律云昨

夜汲洞庭君山青入瓶倒之煮團月還以浴繁星一鶴從受戒羣龍來聽經何人忽吹笛使我松間醒超然象外飄逸不羣可稱傑作此詩乃壬子夏余自隴返重晤滬市寄師書近作見示蓋未刊稿也是冬入都陳言衛道所志未遂憤志圓寂僧臘四十六世壽六十三道侶持遺蛻歸建塔於甯波天童山

友人曹鑲蘅有曉起詩云知我秋堂情緒否忍寒駝坐待天明余謂此類坡語頗耐人思每誦之悠然神往

劉禹生與余同產於廣州四歲卽返武昌十一歲而孤家多藏書能自奮發以文藻稱有廬山秋夕句云雲幔迎河轉秋螢帶雨翻又贈楊滄伯句云魚龍巡渤海風雨讓巴山皆善於鑄辭步武唐賢者

左南生拔萃

念恆

爲文襄相國宗棠第十二孫乃文襄第三子子建郎

中孝勲

之仲子也滄桑後以母老家貧一出爲臨安令邑有南宋所遺

洞霄宮在巖壑間勝境也君紀游賦詩甘雨隨車宰邑未及期以乙丑  
六月因公事觸暑赴杭中道病暈卒年四十四余挽以一律有句云盛  
齒何爲六月息禁方眞覺半圭遲蓋傷其不及治疾也君著有誠齋詩  
集一卷茲錄其五古喜夏映菴姊倩康橋新宅落成卽贈云宦游三十  
年君髮種種白羨餘積清俸治此三畝宅編竹爲藩籬架牀列圖籍園  
林花木新美蔭已徑尺軒窗雖近市恬靜若山澤晴溝一雨過周遭漲  
春碧怡然坐其中歌詠永朝夕豈無舊田廬久拚委荊棘年年閱世變  
無地安片席舟車四方至樂土滬壖適兼金賃一廬一廬詎易得彷徨  
歧路中吾覺天地窄何緣謝塵俗把酒共岸幘泥塗何所畏投轄更不  
惜夜雨晨霽維舟廬官遊蘭亭云篷收五更雨曉風鳴倡條恣遊及蘭  
亭想望非一朝鄉農正胼胝翠秀插秧苗山徑無閒人負戴婦孺曹涇  
雲猶未斂裂帛束山腰栖鳥樂新晴客至如相招緬懷晉時賢良會千  
載遙清談不可接返旆悵塵囂七律舅氏夏經笙先生諱獻鋈江西新  
建秀才同光間官浙江餘姚等縣擢定海廳同知均有政蹟沒後貧不  
能葬一妾一子一女并厝杭州南庫房二十年矣癸亥冬有戚好義捐

資爲卜葬於龍井山外王母墓側會葬歸泣紀以詩詩云廉吏今休說  
可爲桐棺蕭寺廿年垂忍從幽隧看埋骨應想重泉未展眉天豈終昏  
遺善類世猶有澤卜昌期暗傷飄泊緣纓淚策馬西門切切悲此首真  
可歌可泣文字而定海公傳矣讀之猶想見作者當日之哀以思也洞  
霄宮留簡理山道人和東坡韻云波興一擊翠蛟頑撫掌而今蔓草間  
神物早歸江海闊青山自在雨雲間宮前嶺樹重重鎖徑裏溪春輶輶  
翻懲僞我慚聞道晚更無緣接鍊師顏舊志撫掌泉殿階之西七絕夜雨泛舟山  
陰過張氏山莊云轉側烏篷細雨天溼螢將火照溪前夜深何處邀東  
道一款柴門破熟眠斷句立秋日雨霽泛舟西湖云清露未下鳴蟲繁  
白日將沈歸鳥喧從映厂登道場山云雲水滌洄蒼水合大雷隱約小  
雷浮大雷小雷乃太湖峯名秋夜吟和鶴柴云空階亂落梧桐雨近海久諳潮汐  
流皆閒雅鏗鏘必傳之作也

長沙陳慎登拔萃

朝爵

爲吾皖葛希乾太史

振元

之婿遂居懷甯積年

教授生徒湛深經學詞章與余未相識頗通音問相唱和戊寅仲夏君  
以安慶陷歸湘中己卯卒年六十四茲錄其檢篋得舊繡數事先孺人



及亡室蓉萱手紼也拂拭熨貼鏡嵌靜對綴以長句五古云舊繡雖闇  
做觀之意無窮上出慈母手下者故人工寒家夙壁立半生况飄蓬劣  
有四千卷旦夕柴薪供惟此幾縷絲縈繞心魂恫尙想我生前母初賦  
草蟲時清禮文盛刺繡羅麟龍錦袍神仙入細腰合歡宮孔翠雜喜鵲  
鳴塘柳搖風各各弄姿態富麗何戎禮諸繡皆先妣嫁時奩物在母家手紼者皆足驗平  
世民和時物豐吾妻逮事姑慧心頗彫瓏飲水盟古歡結念漁樵蹤挂  
角杏花外曬網寒蘆中有時間策蹇尋梅攜野僮盡從十指間爲我寫  
心胸於時小雅廢神州亂羌戎蹙蹙瞻四方皂帽慕遼東俯仰二十年  
死別生無怱夙昔願永虛高天成烏籠坐愁復行歎傷人憂萬重言樹  
草久枯縷金箱半空春蠶化飛灰秋蝶夢亦慵抱殘乃到此蟬蠹泣書  
叢姑以遺餘年翻喜心猶童持謝壤莊達幻相終冥濛情纏繇而意凝  
重言爲心聲於此見之君著有讀左隨筆二卷說經鏗鏗宜古宜今之  
作也

李範之州牧

大防

四川開縣人乃同光間兩江總督雨亭尙書

宗義之

孫仲壺部郎

本方

之子少敏劬學中歲入仕或云曾官趙州予與一面

未暇詢也君熟於子部著有注老注墨諸書皆有卓見喜吟咏在皖教授十餘年買宅有久居意戊寅端陽後皖垣陷君避亂歸里是冬病卒年垂六十矣傷哉遺稿未梓錄其題桂林黃哲甫香山小識一絕云當年宦轍滯幽州咫尺香山不敢游劫後羨君鴻爪徧萬松陰裏坐危樓語頗清逸

順德羅揆東部郎

悼 顯

乃椒生宗伯族弟一字癭公與先師吳北山先

生同號一時都門有兩癭公之稱嘗官郵傳部郎中且爲袁寒雲業師國變後堅不出仕寄情絲竹以自娛製新曲教程玉霜歌之程遂名播海內而君終鬱鬱死時甲子秋也年五十許余賦詩哭之有腕底魯公筆胸中記室文貧居聊傳食逝日值秋分之句葉遐菴刊其遺詩二卷乃曾剛甫所選頗有遺珠之歎君有書廬江陳子修事五古一篇子修名於勤吾弟也癸卯冬俄日將肇釁當道命子修入旅順調俄人虛實具以歸報朝議乃定左右袒焉子修旣逝俄亦亂予丐君賦詩張之其詩云陳生何爲者十五棄毛錐男兒重報國安用文事爲金陵肄武備天津習水師學成狎風濤使船如馬騎鼙輪窮北溟巨浸破南維拒拒

虎豹韜鬱鬱龍鸞姿傷哉旅順口天險棄如遺國恥不可雪坐屈俄羅  
斯君夙練俄事士女爭攀追平居盛游宴歲時相饋遺有女愛豪俊欲  
以身事之含笑謝俄女恨過未婚時山川阨塞處精察及豪釐徼巡秦  
皇島奉職忘其疲微行問民苦青天今在茲折衡民不爭莊叟非吾欺  
癸卯仲冬月俄日兵相持朝思詞俄情取彼決然疑大府謂君才密令  
有所窺受命不告家變服犯險噉隻身走兵間伺隙銛其詞密報署衣  
帛從者歸疾馳其中實敗絮國事如亂絲間關出虎穴手足已胼胝小  
舟青泥窪中礮沒流漸善泅乃脫水微命天所私親朋不相識枯瘠面  
目驚入險五閱月方冒萬苦歸艱勞不見錄讒謗謬相隨萋斐出同里  
不侯誠數奇吁嗟噲等伍去去從此辭魍魎楊泗州秉節制東陲任官  
惟其材拂拭歎歲遲沂州古巖邦捧檄稱都司廉察析秋毫盜絕閭閻  
嬉盛年志未申旁人歎秩卑天奪胡太速不及擁旌麾男兒殊堂堂馬  
革當裹屍終隨牖下歿不得死交綏阿兄摧肝腸淚絕痛連枝歲月屢  
轉轂每念輒涕洟幸哉善人後有子名曰琦弱冠好文史詞藻紛葳蕤  
伯也顧之慰扛鼎如虎兒君歿十二載俄亂忽猖披君身堯城囚星象



帝座移執政繫頸組繯紳相纍羈巨變彼何速君已預爲期覘國信瞭如甯必待著龜惜君不及見墓草已離離阿兄長太息尺書馳京師厥友子羅子相譽不相訾請述俄亂事報君重泉知吾詩甯足珍持以答陳詩敘事翔洽摘辭典雅傳作也今錄存此君又有雨後郊行云林巒

新沐淨涵光翳葉陰中試鳥吭深澗留雲隨意住亂泉因勢出山忙南海潘叔璣爲故人若海比部之子詩有家風錄其除夕雜詩云圖強不是荆公錯可惜葫蘆畫井田聞汪甘卿丈晦園易主感賦云水雲亮節成孤往麋鹿荒臺亦屢登又濟南句鵲山孤聳一拳秋均有精意

按

卿于宣統初年隨使奧國爲參贊既歸隱居癸酉初夏卒年六十許

陳石遺先生甲戌春僑寓吳門燕子橋予賦詩寄懷云桃花塢裏春如舊燕子橋邊月正明矍鑠是翁忘耄耄晝夜深燃燭寫詩評蓋謂先生方撰石遺室詩話也先生喜而賦答云時魚蒹葭羅吳市燕子桃花入敝廬肯向聿來堂下過斜街秀野較何如蓋先生向作宦京師寓下斜街顧俠君小秀野堂故宅招飲一時名士予曾賦詩紀事故云然耳先生旋游羅浮峨眉既歸閩丁丑季夏小病數日卒年八十二

許靜仁先生慈惠愛人尤嗜吟咏余曾見其庚午歲和曹纘衡移居一律云十年長住北城東榮瘁紛紛過眼中花市尋春偕客至荷衣射策與君同陶潛移宅詩猶在杜甫還家酒不空惆悵江淮巴蜀際天涯何處覓漁翁射策句謂兩人皆登拔萃科也

湯定之處士

濂

一號雙于道人乃甬生都督諡貞愍之曾孫善隸草及

山水尤嫺畫梅得其祖風余贈詩有君家原有畫梅樓之句此樓貞愍所築也嘗游兩粵京師有鎮南關題壁云莽莽雄關夕照殷馳驅那不鬢毛斑泉聲更比行人急山色渾如邊吏閒一樣春風寒燠異了無詩句酒杯頑平生何事差堪信不爲功名始出關君博綜多能尤善相昔有相者謂余壽至七十五君謂不止此己卯春余年七十六賦詩謝之云人生五福壽爲先唐舉徒誇富貴偏君善畫梅知骨格但言耄耄不言錢昔先曾大父相之公於道光初年與貞愍同官杭州君視余如故交焉

池州王滌齋部郎

源濂

乃光緒己丑舉人官戶部司出納宣統中一游

營口共和後遠客廣州既歸滬庚午始與余相識論詩遂成莫逆交嘗

出其稿屬余閱定未及付梓君於丙子孟秋五日以疾卒於滬年甫七十  
余每思往事殊爲感傷茲錄其拱北樓刻漏歌以見一斑序曰刻漏  
元宣慰司陳用和造詩云嶺南八月猶奇暑一日炎蒸三日雨冒暑來  
登拱北樓中有刻漏青銅古四壺高下各一階大小相承孫禰祖大者  
高圍五尺強小亦庶幾二尺許滿貯以水覆以盤一竅中通滴如豆上  
吐下納聲微鏗浮出時籌字可數字始於卯終於寅至寅陡落重徐吐  
一吐一落成古今我來正見字呈午此中祕鑰在挹注此製質樸無螭  
虎年深綠鏤多斑爛款識微茫略可覩延祐五年十二月陳宣慰司置  
茲所在昔文明未啓時測景長圭祇挽土成周挈壺始置官漢宮漏箭  
初遺渠從茲宮禁日增華祖繩良工獨辛苦

梁時製刻漏極精巧

前速率不曾差累黍土衡作賦興公銘雖有繁詞不能譽邇來西學日

昌明時計續紛番舶賈柔鋼繞指細如絲機輪銜接森成鬪如茲笨重

不可移巧拙天淵似難伍一事足令西人驚銅駝幾度埋榛莽

母叶

此器

流傳六百年歷劫猶新足矜詡從來大輅肇椎輪漫將文野爭良窳余  
生好古亦云幸周鼎商彝幾摹撫頤和園裏見銅亭武英殿上看尊甌



蠻荒覩此更足豪坐歎流光轉慚沮典壺老叟恣神奇短紙紛紛黏謾語謂茲異物不可褻誰其摩挲神則忤攝影題籤託尉佗數典竟忘吁亦魯憶昨經過尙府前狻猊嘯天毛栩栩又從六榕寺名見銅佛袈裟皺褶精於縷扶胥之口黃木灣波羅廟裏雙銅鼓並此皆爲世所稀都應愛護珍瑤瑀昨者州前文告頒毀城築路無遺堵此樓此漏亦當衝是用作歌告官府按拱北樓在雙門底乃書肆舊萃處余幼時居粵年久惟聞人傳說有銅壺滴漏竟未一登此樓君偶羈旅便探其奧此詩典雅鏗鏘固足與此器並傳矣又癸丑春旅居大連灣雪後獨步西園句云矮松團夜雪幽澗斷寒流亦蒼勁似杜君仲子鼎字調甫能詩

豐順丁叔雅戶部

惠康

乃禹生中丞

日昌

第三子善駢文能詩錄其夢

中書所見一首云闢盡荒天更九州從今海水不西流牂牁焚道陳方物爭向扶餘拜小侯己亥德宗稱疾實幽瀛臺而廢立議起上海商電報局總辦經蓮珊太守

元善山陰人

創立正氣會號召士夫聯名電爭君爲

作正氣會序辭旨慷慨傾動一時乃因此取忌當路鬱鬱不得志迨豫章毛實君爲直藩聘爲記室君以藩司無章奏權又不樂就貧居京師

於宣統己酉四月病卒年四十二遺稿未梓君有贈余詩云高天厚地  
孟東野索句閉門陳後山時同居滬濱吳彥復師家也

川沙黃孟超

卓

吾友映盦之門人也年甫綺歲詩筆極清得唐賢意蘊

五言斷句如夢回嫌酒薄愁逼在秋先又寄弟云望書南北雁思子短  
長亭七言爲尋落葉緣溪走偶念浮生觸緒驚皆不着邊際自成標格  
戊戌政變宋芝洞侍御以保薦康長素被斥避禍遜之滬變姓名趙善  
夫與范伯子恆相唱和己亥歲暮善夫有次韻少陵杜鵑行云君不見  
蒲卑蜚去化爲鳥昔着柘黃今被烏風巢危偏貌饑慘光采不得同鴛  
雖蓋傷景皇被幽瀛臺行將廢立也徵伯子和范叟亦作一首改曰三  
足烏行而以宋句附注其下余曾見其稿本而鈔存之後見刻本則注  
語全刪矣今存之以誌忠愛云

夏映盦忍古樓集甲寅歲賃廡車埭角林居有次韻答陳子言一首云  
此生儕儻保因樹駕爲屋醉遮鶴柴翁曲巷有郵醪一杯不言語癩馬  
揩枯木再飲如翻瀾寫詩筆至禿頗聞蕭山尉遣迎來急足煩君志州  
壤山水皆可錄渡江颯風雨試繼西泠曲定有許伯會書以敦越俗此

詩謂是秋蕭山知事彭延慶

字善餘江夏人

重修蕭山志聘楊子琴太史爲總

纂予與蘄水陳君絜先

會矩

爲分纂同往搜討百六十年舊事予任列

傳與同人各自分役二載撰成未幾彭亦去此志稿擱置廿年張令宗海來乃集款刊之聞彭君於甲子歲權臨海令卒於任并誌之以見成事之難也

映奩警句如老至交情真有數置之邱壑亦需才引杯華顙曾何語開徑羊求有不忘始信物情趨脆弱祇餘魂夢沒遮欄探支涼風八九月繞看喬柯三百株此聯君自謂車埭角寓園當時把臂入林便覺別有天地滬瀆此境不易得也君後於西郊康家橋購地築居室小有園圃鑿池堆阜構亭駕橋廣植四時花木朋舊以地近多往游觀賦詩爲樂予贈作有駢散詩詞畫園林說夏公之句又曰爲山因一簣受水有雙池皆紀實也君住是園凡十五載近以世變不可居又棄去矣

予甲午客吳淞卽識嘉定余伯陶醫士

德標

今四十餘年矣君一號素

盦善愈人疾且工詞其遠祖易簡先生善詩於順治中由歛避亂遷居嘉邑南翔鎮今八世矣語云淵源有自固不虛也君旋懸壺於滬猶憶



壬申初夏滬地漸甯予賦憶昔篇簡之君譜南鄉一剪梅詞見答云相對話淞濱一夜東風牘夢痕日落江城春不管晴也銷魂雨也銷魂

飛絮滿乾坤惹恨牽愁付酒尊獨有閒雲推不去朝又昏昏夕又昏昏是作一片神行得南宋詞家之訣矣

上海郁葆青以字行別號餐霞散人爲名士屏翰先生

以字行

諡敦惠之

子先生有三十六峯殘雪盡一鞭揮處馬蹄輕之句爲世傳誦餐霞續承家學築昧園於徐家匯恆招賓客修禊其中余亦與焉君有尋春絕句云鎮日尋春不到家柳絲村店酒旗斜梅花欲透春消息處處閒開三兩花又靈峯探梅句忽動探梅興靈峯酌芳尊置酒梅樹下相對淡無言游於物外自據襟蘊誠所謂江左人文猶帶六朝烟水氣也哲嗣元英亦以字行別號迂樓詩有家風西天目山行云慈善亭中暫息肩臨安山色接於潛

兩縣界

此

禹餘糧嶺行未盡身入營邱畫裏天又水

淺石見高低浮板橋十丈橫溪頭輿人爲道春日雨雨後溪水路上流又朱駝嶺過石巉巉紅葉繽紛落滿巖日影忽添襟上碧峯迴將出萬株杉寫景述事具見逸致第二首尤近古謠諺斷句如輕烟入樹暝孤

月排雲上游西天目句溪聲疑雨急燈影挾鐘沈均佳迂樓有女慕潔  
年十六亦能詩消夏絕句云碧梧枝上暮蟬鳴池水漣漪澈底清風逗  
玉荷香暗送蔚藍天遠月初生殊秀逸又甲戌長至句又逢添線日閒  
詠浣花篇亦工可謂謝庭詠絮才矣餐霞刊有滬瀆同聲初集續集

鄭質菴

永詒

上海人年四十許爲味園賓客詩尙閒逸得靜者意亦能

駢文倚聲自靈隱寺至黃龍洞云初日明幽徑輕風漾細沙行車過野  
寺隔竹見人家曲曲泉交線油油菜作花鳥啼不知處我欲問桑麻菜  
花句前人未有也湖上曉起云燕語依稀笑客眠捲簾遙望一湖烟湖  
烟未散湖波碎已有春人上畫船可謂詩人之言麗以則矣又落葉句  
空山寂寂晨迷路古寺深深夜打門亦佳

滬瀆西郊張園爲錫山張叔和建庭宇高曠長廊曲環古木夾道小有  
四時雜花爲士夫品茗游憩地消夏之勝境也林墩谷解元有張園梅  
花詩云張家園裏數株梅歲歲相逢總盛開花上盈盈歌一闋風前疊  
疊酒千杯澄波照影知誰見斜日攀條却獨來眼底風光渾不是一回  
思念一回灰又同王旭莊

仁東

四丈張園納涼句云隔座嬋娟憐好月

迴車駁賊夢涼風平生看竹饒眞賞到此題詩也要工旣歸榕垣有八月十四夜拔可宅中露臺一律云家山風物別成忘良夜登高試一望月靜方知雙塔鬧霧低惟覺滿城香驚枝宿鳥難安夢聞笛離人易斷腸直恨清輝同萬里誰言秋思在他鄉結句有離思蓋謂德配沈孟雅夫人尙居淮北也噉谷時方綺歲詩如宿成諸老驚歎旣而戊戌仲秋都門罹禍年甫廿四拔可哭之以詩有顧或引之去感語動涕泗小臣自愚闇君難安可棄之句而其詩無注未詳援手爲何人余嘗詢之拔可曰此乃閩清孝廉黃乃裳也林於癸巳獲捷黃則甲午後一科會試不第以嫺英文遂入美使館爲繙譯及噉谷將被逮黃君馳來促與俱去此人雖吾同年未曾相識其號則忘之矣余因賦五古一篇記黃孝廉乃裳云戊戌政變事聞者輒傷歎當時六君子噉谷尤醇至有友黃孝廉使館譯文字邀避交民巷聞語極感喟吾爲侍從臣子去吾何避吁嗟黃孝廉閩清儒學派履險不忘友睠睠樹風義斯世無龍門任俠亦其類我聞觀謹言誌之表瓊異此詩可爲碩果亭集作箋注



尊瓠室詩話卷二

鶴柴山人陳詩撰

望江倪豹岑中丞

文蔚

少爲諸生工文善書游南昌訪族人不遇貧困

傭書新建夏芝岑糧儲吾友映菴居士之尊人也時亦爲諸生識之于儔人中館之于家薦爲教授旋舉於鄉咸豐壬子成進士選庶常散館授刑部主事俸薄不足以贍家有友愼延青編修

毓林

得簡陝甘學政

邀往襄校頻年吾邑江龍門大令

開

時官秦中頗相唱和旋佐河南嚴

渭春中丞幕汴濱黃河熟聞治水之術既回京游擢郎中外簡荊州知

府時同光間也蒞任六載庚辰擢開歸陳許道辛巳擢粵臬逾年遷桂

藩旋擢桂撫移撫粵東三載丙戌夏鄭州河決以曩歲荊州治水著績

調撫河南任塞河事既竣工庚寅六月閱兵中暑卒於任年六十八著

有兩彊勉齋詩文集余輯皖雅求其詩未得今始購得之錄其五律鄺

延韓詩云峻阪盤空起山行曉最宜烟苗籠雉翳露草冒蟲絲徑斷人

過怯巖深日上遲籃輿駝瘦馬危坐細哦詩又洛水流何急空山凍雨

多導源通白路

山名洛水所出

作勢下黃河激溜翻巖石棲苴挂薜蘿當年乘

四載疏濬未曾過

北雍洛水不載禹貢

中部縣云我來中部縣蕭索似荒村土室

纔容榻山城不閉門民貧商賈少地僻長官尊瞻拜橋陵側衣冠想像

存

黃帝陵在縣治後

七律息壤

在江陵

云憑將坏土塞泉源幹蠱奇功賴此存異

代堤防師故智中天雷雨護靈根荒涼遺蹟舟楫遠想像神謨黻冕尊  
我爲蒼生頌明德空江歲歲薦蘋蘩七絕潼關送客云茅屋雞聲夜有  
霜關門木葉已先黃行人不見征帆返樹杪河流下大荒自題湖山小  
景云一抹遙山染黛螺天容如鏡雨初過湖樓鎮日無人到水氣侵階  
長綠莎五律深厚七律端凝七絕閒雅皆得力于唐賢桀鑊五古則官  
荊州時夜抵分鹽輿中作云荒途無定程遠近不知里人馬同饑疲宵  
征猶未已前驅阻深潭側轉村巷裏棲烏驚欲飛流螢落復起夜涼思  
悄然頗悟生物理有欲則必爭誰甘槁餓死聖人務平情衣食王道始  
荆楚鮮蓋藏

見史記

此風古如是頻年謹堤防坐使風俗靡安得神禹功

再疏江漢水壬戌十月望日偕李雨亭文

宗義

赴皖晚泊樊口感赤壁

舊事作圖賦詩云殘陽盪微波木葉下巖石輕舟破烟來悄然落帆席  
暝色淡不收江天莽一碧征衫生暮寒長歌倚篷脊緬懷玉局翁去今

幾王戎我來十月望有約如在昔江風與山月俯仰成陳迹頻年征戰  
場故壘餘空壁乾坤一瞬間世變無常格東南方苦兵何處問田宅有  
酒聊盡懽痛飲永今夕當年赤壁游何如此二客七古則戊午春孔繡  
山中翰招集同人于慈仁寺顧祠展禊次東坡清虛堂韻云春晴鎮日  
無風沙舍人事少先放衙翻階紅藥落已盡攜樽邀看禪房花老僧頗  
解愛文士謂戒學欲援孔李稱通家座中三老大手筆俯視餘子紛塗鴉

張詩詩餘陶詞覺香

角雄勝壽陽春圖

奇字窮侯芭亭林遺老昔寓此

恨不喚起分官茶松陰沈沈日晌午僧寮粥鼓閒三過高談岸幘未忍  
散酣如背癢經搔爬江南有客忽不樂時金陵未復側身東望長咨嗟時清

大隱在朝市何須嘯傲耽烟霞五古蕭散七古俊拔皆近東坡

新城陳子鶴冢宰

孚思

道光丁亥在都門贈顧總之明經祿詩云立說

常存天下志耽吟聊慰異鄉身蓋謂其著清嘉錄及頤素堂詩也總之  
乃俠君五世孫冢宰於同治之初謫戍新疆後奉旨釋回未及行與伊  
犁將軍廣福同被命平回亂皆戰死遺稿灰燼僅存此詩於顧集中

陳弢菴太傅於光緒季年過滬予曾相遇於席間今滄趣樓遺詩刻成



公子幾士見贈一部茲錄滄趣樓雜詩云出門何所適長歲具一舟潮來月如盆挂席恣溯遊羣季已滿載無用更命儔就網買魚煮櫂入山影幽鵲鵲四五雙驚飛過前洲流連苦月促潮亦不我留後夜潮應寬不知月好不靈光寺憶竹坡示畏廬石遺云巖扃猶剩題名墨池水應憐皺面人約略老坡眠石處却從榛莽告晁秦題黃松客千山覓句圖句云長白一支雄秀最遼東三老典型留皆清微淡遠可作楷模公卒於乙亥二月朔日年八十八近時詩人之遐壽者也

寄禪上人  
有寄陳伯嚴詩云何處烟霞息見聞匡廬山色淨塵氛相期更結蓮花社傳語青猿守白雲殊覺飄飄有逸氣

石門徐亞陶太守

寶謙

乃光緒庚辰進士辛卯春由刑部郎出守廬州

澹泊甯靜有循良之稱逾年致仕歸時年七十六矣其家近刊語溪徐氏遺詩摘錄一首於此偕午莊笑拈次禹遊青陽菴歸爲作圖卽繫以詩云訪勝得幽趣冷然聞磬音捫蘿尋徑僻看竹入烟深鳥解聽經意僧耽補衲心不知茶話久城角日西沈語曰言爲心聲信然

陳懿叔明經

學受

江西新城人湛深經學詩不多見余於滁州章滁山

綴詩集中見附載其道光乙巳自京師寄滁山一絕云如君高誼絕人寰尺素經年少往還歲暮可能溫飽未朔風吹淚滿燕山語簡情遙頗類唐賢贈友之作章滁山久客南昌遂成知舊云

溧陽狄楚青居士一字平子能詩善畫長齋奉佛於滬郊築室小有園林子嘗過之見其題畫詩云殘月挂疎林幽居先鳥起羣籟久沈寂村雞鳴不已倏聞寺鐘動入耳淨心意梵音更清徹寺僧勤佛禮啓門步山徑微風隨杖履陟岡一東望彩雲絢明綺日出萬態殊人天盡歡喜明暗一輪迴動靜本伏倚愛憎有何關吾心古潭水予因笑曰此亦君之輞川圖也

南匯顧佛隱有過西興絕句云水蒹花外暝烟升小市人家欲上燈愁煞扁舟臥居士捲篷低燭過西興此詩神韻逼肖漁洋四明陳器伯有過隨園舊址絕句云廢址荒林尙合圍酒尊詩帖復誰歸當年綠淨

有藏淨軒

今黃落無數棲鴉戀夕暉此詩感慨殊近朱十也

余猶憶癸酉重陽小集因約在座諸人聯句是夕微雨甫霽器伯得句云燈火生涼意佛隱則援筆對云文章見霸才余謂器伯此句破空而

來所謂神游天外者也佛隱句則謂余刻琬雅耳

合肥詩壇耆碩余所得見者惟王謙齋典簿

尙辰

童茂倩駕部

挹芳

二

人而已

謙齋先生秉性高尚博綜辭藻遭際亂世出建事功時平不居榮利命駕歸與徐毅甫朱默存有廬陽三怪之稱先生優游鄉里獨享大年主盟壇坫余於己亥夏赴郡試攜詩稿晉謁時方學漁洋先生誨之曰作詩勿專主一家他日墮人窠臼難自拔也余服膺其言庚子游滬多識名宿乃格律一變茲錄先生題吳北山師未焚草詩云大筆匡時干忌諱小臣去國獨分明要言不煩聊見一斑

茂倩先生晚號茂先張靖達公

樹聲

甥也嘗與吳北山師同官兵部贈

詩云道廣門成市官閒馬借人語殊典切庚子冬先生由京津避拳亂來滬始得相見居處隔巷每見輒論詩予亦鈔得其舊作數首茲錄古酒器歌云醉骨吟魂悶山足春草年年成慘綠野老攜鋤屬新雨松徑陰森山鬼哭忽驚地坼幽宮開黃腸祕器盡成灰中有一物獨完好形製不類搏與壘嗅之往往有酒氣土花蝕斷龍蛇字斯人已逝物空存



毋乃珍祕遺同志攜歸拂拭供案頭對之不覺雙垂涕青春有酒不解  
飲黃泉沾取嗟無地謫仙歸去無酒客百尺高樓醉秋月北斗倒挂南  
斗斜酒旗曉向杯中沒斯器直與球圖尊湯盤孔鼎安足論縉紳處士  
莫浪語此中恐有劉伶魂共和癸酉卒年七十許

陽湖錢駿華

方琦

乃邑侯紹雲師

錄

冢嗣也曾隨宦廬江及山左弱冠

能詩文辛丑病逝於里年二十六余於甲申縣試時師愛予詩乃得五  
覆終場循例賜宴又蒙賚壬午南闈硃卷一本其時駿華方幼予未得  
見也

丙戌師調黟縣  
後改官山左

迨庚子歲予隨吳彥復師到滬是冬紹師捐道員

赴奉天過滬訪彥師乃得重見紹師因誨之曰滬濱爲南北人文淵藪  
詩詞駢散諸學皆備子宜勗學勿孤負此游詩謹受教今稍有成就賴  
師之善言也語曰中心藏之何日忘之近得毘陵莊君通百

乃仲威孝  
廉清華之

子

贈駿華世兄遺稿錄其登濟南千佛山云上山行數里乃見白雲關

林樹暝可倚兼之風滿山何人伐修竹細語有無間枯坐發長嘯教人  
一破顏斷句好雲時出岫幽鳥不歸山水田忽見鷺雙出高樹有時蟬  
一吟細雨打窗時斷續好風吹樹一參差皆秀逸有致又踏春春共馬

蹄遙七字亦佳嘗隨宦利津邑有河工因著河務議一篇深中利弊玉樹早凋可傷也紹師官東邊道滄桑後棄官寓天津卒壽六十許

吳子恆先生

保德

乃廣東水師提督武壯公

長慶

冢嗣以武壯援朝鮮

功授三等輕車都尉早游庠序少讀書尚俠光緒丙戌歲署邑令劉明府承祖蒞任甫麥秋督徵上忙賦甚急不察廬民稀種麥向例上忙少

納賦餘俟秋成而迫庫書唐端繳鉅款冀以羨餘飽囊橐端

原名永諧向開米行

罄資繳不足將革退端懼飲藥死於署官爲斂之時際承平邑無敢言

者先生方逾冠奮然題七律二首於縣廨壁哀唐端之死斥令甚厲令

無如何也迨壯歲後多閱世變恂恂效儒者無復當年豪氣矣先生好

客而嗜酒僻處沙湖山麓獨居一樓下帷研誦書學顏魯公史嗜陳承

祚兼涉諸子詩效義山山谷每客至縱談酣飲達旦以爲樂

詩

嘗侍坐

先生不棄微薄謂可與言屢預觴宴誠可謂孫陽相馬于驪黃之外矣

既遭滄桑轉徙江湖晚居京師乙卯十月卒年五十三隱淪不仕卒成

高士人以儼之謝敷焉茲錄和彥復弟都門寄韻云努出黃紬道放衙

問誰同醉石榴花此身兀兀緣何事世路茫茫殊未涯樓外鷗鴟歌格

礫天邊鴻雁字橫斜步兵校尉貧無酒

彦弟時官兵部主事

家釀清醪豈待賒重

九日舟次無爲州金龍廟云江南有弟先歸去我到重陽竟未回戍鼓

催人秋點急柁樓聞笛客心哀叢祠燈火門初掩隔岸市聲風捲來楊

柳官河半搖落不須惆悵怨章臺

按此詩乃先生癸巳步李郊雲見贈秋闈報罷歸舟之作

韻時郊雲初移居廬江云小隱邱樊識吏稀虛堂晝靜掩柴扉昨非今

是陶元亮閱世觀人謝子微小閣松聲如欲沸圓湖山影匝重圍報章

不必題名字依舊江南一布衣斷句賀壽伯蒹

富登第云金仙同日歌

兜率玉女無家住廣寒

按此謂伯蒹雖鄭邸之裔貧無住宅賃屋而居

過明故宮云御溝不絕

清冷水昨夜雨晴元武湖

吳彥復師諱保初號君遂武壯公仲子也至性惇愨年十六父邁疾金

州先生往省剗膺肉和藥以療武壯既卒有司以聞德宗念武壯朝鮮

靖亂勳憫先生純孝特授主事服闋入都分兵部學習爲閒曹因得師

事父執寶竹坡少宗伯

廷

講論詩法與宗伯子壽富爲至友所交皆一

時名流酬酢往還飫聞故實學術乃有根柢歲乙未三月補授刑部貴

州司主事引覲賦詩紀恩有聖人南面終憂勤神農憔悴舜黷黑之句



既蒞任考律經年得兼秋審處幫辦主稿明法勵職不畏彊禦不侮寡  
弱有豪貴宗室裕長裕祿裕德等因爭襲公爵假錢債事迫逐其從兄  
理藩院候補員外郎裕善客死於外遺妾董氏攜子如格來歸裕長等  
復訟而逐之先生廉得其情援律力駁如格等乃得住京不銷旗檔丁  
酉秋朝廷下詔求言先生陳時事疏略謂皇上宜親賢正遠邪倭乾剛  
獨斷則萬機咸理若魁柄下移則國非其國矣尙書剛毅惡其言切直  
抑不代達先生忿詆之遂挂冠歸一時僚友賦詩飲餞都門稱盛先生  
原志在三年俸滿冀保升御史一施彈劾以整朝綱今乃遭臧倉之沮  
天也先生九月歸里余於戊戌春亦由海上歸乃師事焉先生旋出游  
鄂游滬游京津貧依故人爲食客終不復仕自號癭公辛亥夏以中風  
疾南歸臥牀兩載癸丑上元後一日卒於滬年四十有五遺命樂此邦  
風土不歸葬於北郊靜安寺側第六泉畔著有北山樓詩文詞集茲錄  
其五古秋夜云雨霽水明樓星稀月窺樹暗蟲鳴秋風寒林鵲驚夜久  
立露霑裳荒園木葉下夜歸云嘒嘒蟲鳴秋翦翦風侵幃客行經石橋  
鐘聲入雲燾蕭條歧路間索寞空林晚日昃少人行荒村獨歸遠五律

曉色云曉色東方啓天門  
跌蕩開雙丸懸赤縣九陌起黃埃  
宦况清如水車聲響似雷  
門前投刺者莫是孔融來  
七律寄楊劄菴大令

霽霖云

萬物紛紛各自私  
蒸蒸黎庶苦罌罍  
我憐駒隙成穿蠹  
君以牛刀困割雞  
結緣千將原不器  
飛黃泛駕歎無輓  
人間萬事誰堪說  
江水東流日

又西

按是時楊公官廬江令

七絕和楚青感事韻云  
啄殘朱果葉成陰  
簾影重重

午夢沈一自雲旗王母下  
恨烟顰雨到如今  
斷句五言夜泊云  
發櫂朝

霞鮮寄纜晚烟綠  
偶至田家作云  
高林過疎雨飛鳥逐行雲  
舟次黃陂

湖云疎花稀更明  
陂水靜以盞春日閒居上竹坡師云  
春風惠然來草

木日漸蘇又讀騷  
若有會懽悴悲三閭送文芸閣學士  
被譴出都云江

海幾人去行藏一葉身  
出平則門望西山云  
松嵐曲徑蟠草色連天漲

效韋體云小園微雨霽  
空山芳杜春謾謾  
松風古媚媚花月新如何今

日地不見昔時人  
七言答人云  
休問征遼舊門第公卿今已作輿臺答

定山云誰豈不知榮路好  
褊心孤寂總乖時  
題吳彬士寒江獨釣圖云

終是直鉤無所獲  
不如歸去釣空山  
先生文效兩漢詩學韋柳及荆公

書法酷似褚河南人多寶之德配黃恭人

裳

乃合肥韞之太史

先翰

孫

女亦喜吟咏有紫蓬山房詩集

紫蓬山在合肥

庚午長至有感時寓秣陵二十

八年矣五絕云風雪灑簾鉤烟波無限愁秣陵生白髮靜夜擁棉裘嗣子世清字仲穆早歲游庠才而賢逾冠東游留學易名炎世畢業歸繞道朝鮮謁武壯祠賦詩有肯將家世易豐貂之句甫出仕爲直隸候補知府以喉疾卒於天津年二十四時丁未冬也

通州范肯堂明經

當世

原名鑄字无錯文學桐城詩肖宋人以布衣名

滿天下庚子有題吳北山師詩集云以行得官以言去古人如此亦堂堂看渠八海橫飛日更向萬山深處藏何由黑髮看成白應許玄天不作黃試把遺書往成誦逸民儔侶自成行先生頗愛余嘗講詩法有知己之感甲辰冬卒年五十許著有范伯子集

鄱陽朱輦吾

輦

肄業上海真如鎮暨南大學丙子冬以詩來就質余愛

其五絕詠梅云不遇林和靖南枝枉著花縱教開庾嶺終是在天涯此作擅龍眠白描西江詩派中允推健者七絕秋夜江上云湖海生涯久慣遊江心月白漸知秋楓林十里依然綠幾點漁燈尚未收後二句悠然無盡是寫景佳作耕云朝出耘田向暮歸桑麻閒話傍柴扉平生只



解躬耕樂未識人間有是非後二句有深味是淡泊人語君年逾綺歲湛精書史不雜塵紛一時佳士也

王瓊望

先獻

廣東瓊山縣人肄業無錫國學專修學校與吳伯魯爲友

談及予喜近人詩因寄詩稿來自稱弟子余賞其病起句淨几焚香閒讀易生涯淡似六朝僧有澹逸之致王生文勝於詩來書紆徐委婉似六一翁瓊島得此可繼先輩已

金山彭鶴年

天龍

年未冠負笈梁谿聞伯魯談予寓滬因寄詩乞定茲

錄山村雪霽云隔江遠烟起淡日滿林端墟里人歸晚雪晴山翠寒夜吟云一夜小窗白恍疑山月明不知庭雪積漸覺曉寒生均有思致

近人絕句佳者奉賢莊呂塵

義

之一春云鬱金堂外雨霏微窺宋花枝

漸欲稀惆悵楊花滿征路一春長是點人衣千回百折善述離情松江

沈瘦狂

文浩

之歸途云衰柳寒鴉帶夕暉故園寥落淚沾衣西風十里

松江路不爲鱸魚不肯歸松江人說松江事最妙嘉興朱大可

奇

之鄧

尉云籃輿軋軋曉禽啼隨意穿林復渡溪徑仄低枝時礙帽花深小雨不成泥此詩非曾遊鄧尉者不解佳處廬江章敬禮之宣城暮春云小

謝城邊燕子歸芭蕉葉大綠蕪肥楊花不解春將去點點牽愁上客衣  
寫景抒情風神搖曳堪與呂塵頡頑諸作置之唐人絕句中皆無遜色

上海孫漱石處士

玉聲

年躋耄耄有西湖春游詞云濕雲罩住遠峯青

幾似冬山睡未醒行近猶難辨何處聞鐘纔曉是南屏南屏二句寫景  
入微前人未有顧景炎

樹圻

游太湖洞庭西山詩云片帆入暮怯輕寒

月上東山走玉盤七十二峯橫碧落模糊都向月中看水光山色盡入

詩瓢如聞成連水仙絕調二詩自是宋人佳境

漱石翁于己卯初春卒年七十七

周梅泉觀察

達

池州建德人世以與嚴州建德相近而同名今改至德

從唐舊稱也君爲全唐詩中咸通十哲中丞公諱繇之裔祖慤愼尙書

諱馥

山字玉

歷官兩江兩廣制府父健之觀察諱學海以名進士官游江

浙善醫術著書多種行世君爲慤愼長孫早歲岐嶷夙成游庠序爲上

舍生耽六書九數之學而數術尤精博究古今中外疇人之書而握其  
要凡市商有疑難之計簿每延君綜核輒脈絡分明釐然不紊世稱其

能納粟爲道員覩時政日非不欲仕滄桑後寄居滬濱於西郊購地築  
巢園建亭榭植花木春秋佳日恆招遺老名士觴宴其中賦詩爲樂後

以市囂鬻去卜居遠郊欲以隱逸終今年六十二矣編詩四卷付刊曰  
今覺奩集錄其春夜巢園雨止不寐有作云雨過月復明飛雲若奔馬  
夜風盪積鬱露立得瀟灑更闌簷溜歇餘滴猶在瓦微馨出花氣涼意  
不可假空庭流苴藻天繪孰爲寫春月勝秋月灑灑生淡冶神清無睡  
情靜理契者寡翻愁朝日出人事復牽惹過眼戀清景徙倚風廊下鄰  
樹翳深燈知有未眠者暮歸寫望云車過銅街雪作泥樓廊海色晚淒  
淒風燈不共疎星滅留伴歸人照馬蹄皆專氣鑠古摘辭切今斷句如  
閒窗隱几燈初穗薄暝鉤簾月未弦意行漸覺屋移樹小立不知月上  
衣小爐熨手不龜藥大月照人無盡燈罷絮池臺春易暮落花天氣雨  
餘寒皆佳又野雲分雨與春田七字爲前人所未道贈袁伯夔云杜老  
秋風補茅屋韋郎日暮踏斜橋用意伯葵舊居斜橋令人讀之有山  
陽聞笛之感昔予刻皖雅乏賞君與袁君皆奔走爲集款殊可感也  
拔可嘗有句云不經風雨連番劫那得池塘盡日陰眞見道語又墨巢  
卽事云數點楓酣猶強酒一林橘冷欲包茅洵屬運典入化

錫之文有丁丑春陰排悶云小院迴廊春寂寂雨聲猶在簷間滴紫窗



爐篆半氤氲墮几瓶花太狼籍羈人新自故鄉來紅藥欄前花未開夢  
想少年行樂事尋詩亭角踏蒼苔婉約似元人言有盡而意無盡

紹興酒爲諸酒之冠通行各省歷久彌旨予嘗叩其故於紹友鍾君鍾  
君曰釀此酒惟恃鑑湖水糯米二物此水盛碗滿而不溢積氣厚乃能  
持久耳余因賦詩云窟室鍾期語不休紹興年號鑑湖留碧波凝乳光  
浮碗晚糯成糟豔築邱種秫競師彭澤令分茅不列醉鄉侯何須徐邈  
誇中聖自有嘉名徧九州

歙縣有二詞人一江君彤侯

暉

一洪君澤丞

汝聞

洪君詞已刻江君詞

隨手拋擲都不留稿余曩聞而索之未得歲丁丑早春君雨雪赴宴蹉  
跌傷足閒居無俚撰詞數闕錄存於此燭影搖紅云流轉浮生晚來禁  
足真無計便如汀鷺縮孤拳何限淒涼意容易明珠委地倚虛帷暗塵  
又起夢魂沈損斷雁聲中愁書難繫

燈影搖紅酒邊多少關心事創

禽不恨楚人弓但灑天涯淚看看龍蛇曼戲儘嬉春斜陽一醉又誰橫  
笛吹落殘梅教伊心碎寄懷王撫五武昌調寄木蘭花慢云杳春江水  
漲儘流怨去來潮記踏月銅街雞聲劍影夢斷魂銷飄蕭十年短鬢念

滄江一臥到今朝投老一邱未得黃昏細雨無聊凝消薄酒話中宵

舊事冷瓊簫奈采采江蘿荅華剗地此意蕭條搖搖燈紅影瘦又危亭

草色上征袍惆悵素雲去遠樓前玄鶴難招又詠丁丑花朝皖城春雪

一闋序曰韶春過半急雪忽來填戶灑窗含淒成詠調寄水龍吟云玉

龍哀咽遙空華鬢乍換人間世瓊妃起舞冰綃飄盪珠跳珮委喚醒梅

魂縞衣濕徧傷春衰涕是香叢小劫蜂悽蝶慘渾未解蒼茫意也擬

憑闌危睇奈飄蕭江山如此賓鴻社燕去住無端相憐無計際海桑紅

漫天絮滿啄泥何地甚黃昏淡月簷花細滴有人無睡高華雅健在稼

軒白石之間丁丑冬和羅長民過綺園韻並柬演生調寄齊天樂云儘

沈吟過江情緒城烏啄啼何處破屐尋烟長鏡鬪雪誰慰歲寒尊俎飄

零似羽悵日莫津亭永嘉人聚如此江山豈期重拾墜歡古故人音

書間阻縱扁舟落手挂席無處鏡裏霜繁燈前夢短暗省殘生羈旅閒

愁最苦怕目極平蕪傷心難賦徙倚危欄冥冥空雁侶洪澤丞未刻稿

有甲戌上巳飲徐丹甫寓廬觀所植山荷葉五茄皮樹有賦調寄減字

水蘭花二闋其一云亭亭碧玉雨態烟姿看不足移自山中西子西湖

未許同 冰漿供養銷盡鉛華餘色相塵想難捐又聽江南唱采蓮其二云交加翠葉舉似五行根性別也解留皮閱世酸辛祇自知 相將入藥起疾功能良不惡一酌春風詩味爭如酒味濃

皖北詞人素稀今推吾廬劉宣閣

麟生

爲巨擘宣閣乃錫之文冢嗣也

猶憶壬申初夏滬道始夷予與君同往霍必蘭路酌朱彊邨先生墓宣閣言及曩以詞請質朱公公欣然批評某闕佳某闕某句當改今將菩薩蠻詞上闕次句改成而公已逝因相與歔歔者宿已渺不置茲錄其詞云澄暉沒水波如織霜林掩映寒鴉色怎得似蟾蜍名和利也無秋花仍耐冷寒緯愁成陣歲歲晚風前生憎月月圓君著有春燈詞

懷甯程演生爲康雍名宿箋注陳其年檢討駢文叔材先生

師恭

六世

孫少時肄業學校潛修篤學爲沈子培提學所拔識及壯負笈巴黎學

成歸來經歷天竺憩雙樹下撫白牛緬想釋迦證道樹三乘法以指迷

方又游阿富汗波斯土耳其暹羅

今名泰

四國覘其風土賦五古長篇述

土耳其新法之善一爲安徽大學校長崇儒重道人文蔚興至今稱之

著有二古軒詩集未梓余與有交誼假讀錄其七絕竹溪晚歸云溪南



溪北花正飛閒攜竹杖晚游歸山橋日落行人少佇聽疎鐘隔翠微早  
春云手中道書讀未熟江上故人招不來村居白日渾無事處處春風  
看落梅五律過懶云過懶黃昏起書堂已著燈風華銷欲盡興味薄難  
勝履墮教誰納冠欹對客憎隔簾梅影淡裁句謝無能數詩清麗彌近  
溫李贈馬一浮五古云尺素達精微匪敢邀盍簪何期蒙下眷玉趾竟  
賁臨我祖傾蓋交儒者固所欽披雲企高朗敷辭綴德音鳥鳴出幽谷  
佳詠擬前林意氣結予懷遺贈非南金醇雅逼眞選體又甲戌初冬游  
黃山云大地開奇境天都極壯觀仙人何處所我輩自盤桓水浴丹砂  
豔雲鋪紫玉寒

紫玉  
峯名

聽松憑石臥三十六峯寬字字遺鍊可謂四十賢

人君游休寧訪戴東原先生墓見禋祀久絕墓前已犁爲田慨然言於  
當道修葺復舊觀歲時地方司祀事亦可謂難能者矣

四明金雪塍吾友李雲書部郎之戚也工書嗜詠頻年游蜀詩學東坡  
深入其奧茲錄其題畫絕句云飛瀑懸空兩白龍一龍鱗鬣化青松似  
憐好景無人賞着箇溪頭策杖翁殊有奇氣昔人謂名山大川發越襟  
抱信不虛也近又得其山居詩云山居人早起野草露漙漙遠山繞白

雲飄動若鷓鴣小鳥悅晨光飛躍噪林端輕風一拂衣弱體先知寒人生何苦樂不妨隨遇安四望皆秋色胸中春氣盤興來託微詠一笑有餘歡彌近自然

武陵陳伯弢大令鏡筮仕江左有句云萬里一身如墜葉三江二月有輕雷可謂好語如珠而身世之感已寓乎其中矣

無錫錢默存

鍾書

勛學不倦嘗有句云衣人高枕臥游錄作我下帷行

祕書殊典雅

蕭山王叔賢茂才

希章

乃南陔中丞

紹蘭

曾孫能詩橐筆依人有句云

生難絕俗花常笑倦不還山鳥亦譏寫貧狀令人增慨宣統元年病卒

合肥楊生韻芝

開森

近寄遊覽詩來錄其界首

爲浙皖分界處

云孤舟依曲岸

界首衆山圍征路剛辭浙鄉音却近徽春雲寒碓語擇樹野禽歸何處鐘聲發禪關隱翠微晚宿白嶽農家云柴門依白嶽層巘門嶙峋竹塢能醫俗桃源可避秦燃松光勝燭煮筍味如蓴靈谷鳴虛籟中藏萬古春二詩善寫風物讀之可當臥遊又威坪舟中句云層巘玲瓏夾碧渠歎縣道中前半首云穿林晴翠滴渺渺客心清馬上醒殘夢峯頭露遠

鉦又羅田遇雨句云亂雲迷遠樹濁浪打孤城均佳

涇縣章介人

宗藩

先世於咸豐亂後游廬以醫濟世遂家焉君讀書稽

古嗜吟咏有己卯正月初五日聞布穀聲詩云宿雨初收乍放晴吳棉未換峭寒生如何纔叶東皇律便聽疎林布穀聲是歲早稻有穫遲禾因旱皆槁鳥鳴誌異此詩可入災祥志中

廬江吳明業

隆赫

爲鑑隱丈文孫年未弱冠喜爲詩有祖風晚步五絕

云楓如落照紅葉趁迴風舞躑躅欲黃昏一陣模糊雨後二句超然象外卓犖不羣明業之兩叔及姪皆爲詩而淺嘗輒止鑑丈每日隆赫爲吾家中流砥柱信不虛也

近人斷句佳者如閩縣李釋堪之急雨返風松偃蹇斷崖妨路竹扶持定遠方頌如

燕報乃子歲廉訪從孫

之興國衣冠秦法令故家文獻漢官儀吳明

業之一片微雲縈澹月千家繁杵答寒蟬皆字斟句酌銖兩權衡一絲不懈者也

南陵有二詩人一陳璞珊一王明孝皆年方綺歲負笈滬校璞珊筭箕

灣

在南陵

歌云一灣復一灣行行近幾許但見陵陽城不見陵陽路質朴



類古謠諺虎跑寺云春深漸覺鳥聲柔白石蒼苔一徑幽老衲閒中無  
箇事山門靜坐聽泉流亦清逸可誦明孝南翔古漪園觀菊云古菊茁  
名園繽紛如霽雪滿眼看花人誰知陶靖節胸有涇渭卓爾不羣斷句  
落日大江秋幽夢抱疎鐘蒼松出古道雲捲馬頭塵皆可入摘句圖

王什公見贈云灼灼東南處土星滄桑彈指幾回經黃詩曾筆今無已  
秋挂春蘭老九齡覆瓿太玄休更問燒桐焦尾倩誰聽抱殘守缺吾徒  
事異代猶能播異馨又去艇槽聲隨岸遠跨橋欄影壓波新句殊清麗

泗州張燕昌傳臚

啓後

工文善詩書效率更尤精皇甫碑予贈以詩云

皇甫碑中字歐陽獨擅能遙遙千載後皤皤一時稱揮翰臨池久陵雲  
寫榜勝觀書悟情性溫厚出端凝君見答云歐書參隸法皇甫倍精能  
試學邯鄲步甯希大雅稱東蠅癡易誚渴驥力難勝何似君詩好遙山  
入望凝予曾與君及諸友釀金重印君鄉賢袁硯亭太史詩茲錄於後  
袁介箴太史

續方

泗虹人也道光癸未成進士改庶常既散館授福建

松溪令旋丁外艱歸服闋謁選授江西星子令歷任崇仁高安諸邑年  
七十許歸里卒時道光季年也著有硯亭詩鈔五卷子曩刻皖雅求之

不得丙子歲乃從老友金山高吹萬居士假得孤本景印茲錄報恩寺  
早秋五古云山徑隱層雲禪房依山麓何來戒律僧結構此茅屋盈盈  
一勺泉森森萬竿竹風聲雜水聲清冷如戛玉我來息塵勞地僻無拘  
束少焉新月上晶盤挂喬木冷氣乍沾衣鬢眉映寒綠樂與素心人清  
談任往復白鷺渡五絕云水田漠漠陰白鷺雙飛起渡口獨立時炊烟  
上墟里二詩皆似右丞咏晚香玉句云涼入紗窗風細細夢回紙帳漏  
遲遲不卽不離亦佳作也袁公又言天長戴湘浦殿撰蘭芬壬辰典試  
閩中丙申自陝甘學政解組旋京遽卒余求殿撰詩亦未得附記於此  
望江陳逸夫驥乃介菴太史樹屏之孫知白處士榆蔭之子年甫逾冠  
客滬嗜學來執贄爲弟子以所作請質五言思親云鯉對知何日鴻傳  
字一行又臨餐不下嚙菽水愧難將余賞其頗有至性七言箕畢自殊  
塵俗好冠裳猶保劫灰餘具見抱負不凡餘如驢騎野寺烹泉活燕掠  
晴湖打槳喧按此用諺語謂小艇二人四槳爲雙飛燕也珠遺滄海鮫  
人泣泥落空梁燕子飛晴雲雜雨秋多幻霽月迎潮夜未暝皆近玉溪  
又題袁寒雲日記云癖錢原不俗唾玉總多情亦是公論

合肥李曉耘

國榛

詩人郊雲先生

經達

冢嗣也二世寄居廬江四十餘

年矣丁丑五月下浣余過蕪赴滬君有錢別詩云一角遙山似畫屏傍

湖微雨正冥冥樽前杖履陪姑孰眼底文章聚客星

周頌臨姊文吳伯魯兄皆在座

里歸程元亮井廿年問字子雲亭西街老屋能招隱叢桂花開尙滿庭

中秋後先生有歸里之約

是秋避亂無爲有句云高樓一角斜陽裏渺渺晴波葉葉

帆寫景如繪可謂名句惜無全篇爾介弟萼季

從衍

亦余門人有自題

山水小幅絕句云脫葉飛泉聲滿林迴風戛玉復鋪金少人多石真幽

絕芒屨歸來一徑深逋峭處似山谷

丁濟人

廷浦

予內弟也爲從叔岳拙儒先生

遇堯

冢嗣性倜儻年十三

能留客頗似孔融近年從余學詩遭亂游蜀有移居絕句云飄蓬又去

漢升祠

成都西郭有黃忠祠

來傍牛欄借一枝悄悄心情誰似我黃昏鶴唳獨歸

時善寫蜀中古蹟可謂不負遠游矣

吾邑金友石

堯階

貧而耽詩訓徒自給每見古籍典衣購之其篤好如

此錄其警句斷橋流水岸殘堞夕陽山連日東風連夜雨朝來簾外嫩

寒多黃鶯坐久日將暝亂向白雲深處飛



南通徐貫恂明經

鑒

一字澹廬范肯堂先生門人也嗜學好古爛辭章

能書畫宣統初年例授知縣未仕共和後爲人牽率一出爲部曹旋歸

隱自放于山水間君篤愛儔類與余交尤摯既遭兵燹家業凌替遜跡

於滬抑鬱患項瘍卒時己卯寒食也年五十三錄其大沽口云京塵驕

挾火雲飛逃暑人從渤海歸七十二沽微雨過一絲涼意到征衣無錫

紀游三首惠山云北塘簫管畫船開一路湖桑夾柳栽泉水自清人自

濁更無蘇蔡門茶來皇甫墩云何物黃婆領一墩

皇甫俗呼黃婆

無爭無讓

水渾渾此游仿佛溫鄉夢重叩鷗波舫外門漆湖云東風吹雨欲成烟

吞吐當胸氣萬千七十二峯看不足隔湖喚取打魚船西湖雜咏一線

天云飛來雲數峯漏補天一線學佛二十年今纔見佛面九溪十八澗

云山近茶成市溪迴石作橋水聲清可聽休挂許由瓢甲戌二月廿二

日江靖舟中云淞水碧無情今朝例不晴別饒行客味江上過清明諸

作皆有別趣斷句過郁葆青味園云蒼蒼郁水洞隱隱法華臺

自注郁木洞在

玉筍山南乃蕭子雲隱處見雲笈七籤

尤典雅予賦詩挽之惜君枉死吾鄉有治父山周

遭二十餘里中產異草善愈人疾瘍醫黃占亭採藥熬膏治愈患頸疽

數人惜千里睽隔君爲西醫割治所誤也冶山靈草見余所撰冶父山志中

予戚宛醒吾處士

時嵩

嘗有句云閒看落花飛過谿余歎曰佳句也因

仿趙倚樓之例呼爲宛過谿其長子鳴韶字鳳儀乃余門人能詩有父風游冶父山句云雲歸萬壑暝風響五湖秋五湖者謂廬江之黃陂沙湖白湖排子後湖也

里人陳百一

克超

與予不同族年甫逾冠有訪友不遇句云虛室靜無

人但有燕來去殊秀逸

劉慰春

梅

乃詩人東屏上舍

震

之季子年四十二與余初相見出示過

宣化長城七律余愛其峯頭月挂秦時鏡谷口人耕漢將營二語悲壯可爲窮兵黷武者警

予戚章哲騫秀才

人樹

年垂古稀遭逢離亂性情淡定困守家園有己

卯春寄余一絕則喜園中牡丹盛開之作也詩云車粼粼雜馬蕭蕭二月罡風起怒潮花好祇須看半放鼠姑生日是花朝寫邑里景况如繪介弟夢芙茂才

人鏡

亦以詩鳴五絕尤擅長秋郊晚眺云萬壑風蕭森

千崖石偪仄遙指前溪中一帆挂秋色雪後懷聶星五黃溪云寒月照  
空庭積雪無人掃何當駕扁舟訪戴山陰道丁丑春余歸里重至公園  
茗話賦詩見贈云點點苔生石上衣兔葵燕麥恣茁肥荒蕪漸覺無人  
到祇有閒雲野鶴飛君近游蜀歸言荔支產瞿塘山中又言通江太平  
等縣皆產銀耳生於深山古木上質厚氣清能補益人

姚生質人

實

乃吾邑進士紹泉司馬

鑑勉

曾孫月齋明經

起

益之孫少

孤恪守祖庭訓至於成立余於丙子春歸里始識之愛其綺歲詩筆清  
拔導以塗徑質人遂孳孳不懈近歲跋涉關河詩學益進錄其曉發馬  
當云棹發雞鳴夜未央波心孤月影微黃此行如有江神助一剪春帆  
過馬當過武昌云江流繞郭布帆飛楊柳千條綠尙微正是春風好時  
節筍香魚美不須歸到衡陽云道旁官柳拂清霜郭外寒山一桁黃亂  
眼西風殘照裏又隨征雁到衡陽宿安江

縣

境

云路入黔陽上百盤入

隨飛鳥度重巒難忘一宿安江客山店燈昏夜氣寒沅江晚眺云澄江  
如練秋光夕斜陽點點漁帆白一雙翠鳥忽飛來衝破烟痕下沙磧五  
言斷句如新秋俄已至樹色頓全非流水得閒意春雲無定蹤誦來渾



似舊敲處轉生疑黃葉作秋雨空山生暮寒地臨三楚盡山入百蠻多  
池蛙噤不語園鵲馴相依怪樹當門立幽禽裂竹啼又雲來樹忽低五  
字及鳥就樹陰涼槐蔭入門涼兩押涼字均妙七言斷句如四野農歌  
田租德一天雲暗海王祠寄懷伯魯黔中云三年感舊兼師友萬里投  
荒半死生湘黔道上云度嶺籃輿輕似鳥臨溪板屋小于巢諸作漸近  
自然是能傳衣鉢者

吳生伯魯

常燾

善桐城古文亦耽詩有懷姚質人云樽酒園林相識初

清詞細字雪霜如眼中此調知應少亂後他鄉見更疎力學惟詩多自  
得游心於古亦非虛烟蓑雨笠歸來是待及春風共荷鋤領聯佳可謂  
情文兼至余嘗介紹伯魯師事袁夔菴部郎學爲古文夔菴極稱其所  
作氣充詞健爲諸門人之冠爲改文一本亂中郵寄竟致失去殊可惜  
也

合肥李駿僧

家煌

乃健父部郎

國松

冢嗣爲貴池詩人劉龍慧之甥嘗

從學詩宗法韓孟有癸亥六月十五夜拏舟吳門盤溪侍舅氏納涼南  
蕩泛舟荷叢而歸絕句云清涼地證鼻功德晝夜時憑花合開水靜心

平湖月滿更無人語有風來按無量壽經西方以蓮花開合爲一晝夜  
昔君年少長齋奉佛篤學崇文人所難者今李氏詩人惟曉耘尊季及  
君三人而已

戊寅三月十五日冒鶴亭借李拔可墨巢

園中多懸伊墨卿太  
守墨蹟因以爲名

爲巢民

徵君作生日兼以自壽

鶴亭與巢民  
先生同日生

是日各省交游書畫家詩詞家文

家到者四十餘人予亦預焉各有贈作以李園主人詩最翔實茲錄之

詩云平生好爲園獨樂非所性今宵果何幸得此朋友盛撲翁壽無極

疚叟

鶴亭一  
號疚齋

眞後勁適懷同物感遺子殆有命暫寬陸沉憂爲子以地

慶丹青紛傳觀

有巢民先  
生小象

舉座皆起敬月輪換花影酒半一時正雖慳

紅裙歡要速白戰令吾園非水繪氣類或不病但恨不能杯敢請子爲

政滬瀆自丁丑秋兵燹後百事寂寥今得此盛會雖山肴野蔌猶令人

想見水繪餘風也

袁伯夔丁丑春讀冶父山志因憶舅氏唐翁七古一篇中有云當時吾

舅客六安歷肥舒霍到潛川冶父山下暫居住朔風打窗斗酒寒又云

此乃吾舅少年事末云四十七年如頃刻不堪回首淚縱橫按唐翁字

予中湘潭人客廬江時乃光緒十六年庚寅也此則可補入山志中

衡陽蕭厓泉居士

俊賢

善繪山水花卉宣統庚戌相遇白門今三十年

矣前歲重遇於滬談往慨然君因繪秋柳斜陽圖便面爲贈且作元人語自署其端曰冷清清地落照牕一樹柳彎腰逼眞秦淮景物詞語殆謂予衰老尙存也今又三年彼此皆健在君小余一歲而畫名益高近見譚瓶齋題其風雪歸舟圖七古因錄於此詩云人生佳境嗟易逝老去空思少年事何如卽事寫作圖長從故紙追清致岳陽樓迴洞庭寬湘波浩淼冬流寒有客孤帆溯歸路開篷指點湖前山一宵風雪景逾好却與詩人成畫稿營邱妙筆狀寒林右丞粉本圖霜縞展卷知君畫理精鄉山咫尺眼中橫細摹雲夢三冬景追寫嘉陵一日成四十年眞一瞥眼畫格游蹤經幾變人間桑海任推遷筆下烟雲轉葱蒨畫伯從來多大年看君已是地行仙人高自應邀天爵米貴何曾損硯田當年得意揮奇景至今留得前游影題詩幾輩已沉泉人壽何如圖畫永交契忘年二紀餘評詩讀畫久相於興來更有不傳本留我他時紙尾書

南史蕭貴善畫於世不傳

詩情畫稿意態雙絕此詩卽置之宋賢集中亦居上乘



餘姚陳涵度乃山陰任董叔秀才門人爲朱彊邨先生再傳弟子近攜  
稿來謁余見其所作多自改得鍊句法深異之茲錄其題張林莊時賢  
石譜云溫溫吾張子學邃證靜理獨抱歲寒心皜然塵不滓性愛一拳  
石珍逾金玉比掩關懶埽除爐中煮泉水匪慕道家流聊寄微尚耳近  
得時賢蹟皴瘦皆可喜懸之素壁間臥游樂無涖吾畫醜不堪詎敢獻  
末技爲君歌短章才薄慚語俚滬舍夜讀云轉廊微月帶疎星漸息繁  
聲兩耳甯靜與青燈深夜對驅除塵夢籀遺經皆清婉有致斷句松醅  
風擊筑澗瀉水鳴琴亦佳君德配何文綠女士蕉題亦能詩有賀沈兼  
異丈重游泮水一絕云和似春風學養深滬濱絃誦播元音知公泮水  
重游日六十年間希聖心詩筆既清書法尤秀今之不櫛進士也余因  
賦贈一絕云簪花妙格換鵝羣謂賢夫涵度亦善書日夕吟聲互答聞彷彿彩鸞  
書韻事能教五代繼唐文

嘉定何芝石爲夏映菴之門人從學詞及畫近爲陳涵度何蕉題伉儷  
繪蕉窗雙課圖並題兩同心一闕云細雨吹簾苔痕青闌蘋花暖鴛夢  
初回爐烟燼鶴眠方適正新秋楓影催詩亂蛩鳴嗇 恰好綠雲遮眼

碧堪試墨茜窗底書譜偕臨華燈畔素箋共擘應羨他眷屬神仙瑤天  
雙謫婉麗似柳屯田

樊樊山灞橋旅邸題壁云柳色黃于陌上塵秋來長是翠眉顰一彎月  
更黃于柳愁煞橋南繫馬人可謂風神絕世易實甫有句云胡地草青  
曾寄語匡山頭白早歸來對仗極工饒有風致

陳玉笙處士

儲巖

乃涵度之尊人也隱居會稽怡情邱壑以詞自遣專

學白石稼軒二家得其神理共和壬申春卒年六十四矣著有秋水詞  
一卷錄其風雨淒然夜不成寐調寄雙紅豆云風打更雨打更羅帳燈  
昏夢欲成譙樓鼓一聲 風有情雨有情相伴秋蟲絮到明啾啾作麼

生山村調寄南柯子云罨畫山村景烟嵐日夕姿竹籬茅舍傍清漪一

抹隔溪殘照墮崦嵫

水面風萍合堤腰霧柳欹波紋如縠綠參差定

是浣紗人去未移時江村聞雁調寄點櫻桃云雁陣驚寒西風一夜來  
千里蓼花紅矣秋雨秋風裏 遠樹青帘指點漁樵市風乍起商聲滿

地總是江湖意聽鵬調寄於中好云曲曲橋通曲曲堤漁舟艤傍小橋  
西隨身好是無長物斗酒雙柑獨自攜 腸鼓吹耳刀圭碧陰陰處聽

黃鸝從今都種垂楊柳聽取黃鸝盡日啼斷句菩薩蠻云作底種芭蕉  
情人怨夜遙臨江仙云情懷如中酒斜月下斜廊皆餘韻悠然不盡近  
涵度將刻其先集余爲題辭有句云如何未遇彊邨叟浙水東西各自  
流蓋入地間隔詞派不同固難合并也

任董叔茂才

董

寄籍山陰本貫蕭山乃伯年畫師

顧

長子能詩詞善畫

共和丙子夏卒年五十四其門人陳涵度錄示其題自畫探梅圖一絕  
云騎箇驢兒得得過一肩風雪與詩駝梅花笑我窮寒骨比似襄陽定  
若何綽有風趣

涇縣胡復初先生

學書

一號雪堂吾友樸安居士

韜玉

之大父也少孤

力學既長敦義道光中游庠咸豐季年以涇邑兵燹憂鬱而卒年五十  
五事具涇志義行傳著有養拙齋詩集錄其五絕夏夜云晚風生微涼  
露下空階濕深院悄無人時見流螢入七絕飼蠶詞云瞳瞳日影上紅  
牆暖護深閨錦幔張清酒一壺香一瓣大家齊祝馬頭孃讀罷偶成云  
一縷輕烟竹外籠烏聲無數噪晴空離騷讀罷無餘事閒坐窗前數遠  
峯均秀逸似晚唐秦淮竹枝詞云纖月如鉤挂柳枝畫樓正是上燈時



李郎倫聽新翻曲，乘着烏龍小艇兒。此與吾先祖菊生公過金陵詩天地多情水亦柔，秦淮歌舞望中收。殷勤寄語湖山道，莫向愁人喚莫愁。皆令人讀之想見道光時秣陵游宴之盛。

胡愛亭先生

鼎

爲雪堂先生長子，乃樸安之尊人也。於咸豐離亂保存

先人遺著，艱苦力學，同治中游庠，游歷贛滬，筆耕濟家。教諸子皆成立。宣統辛亥冬卒，年六十九。著有守拙齋詩，予嘗序之，謂其言雅正而音清越，邈世無悶，蓋效紫陽者也。錄其題畫云：谷口一茅亭，結在無人境。獨坐萬峯寒，松濤滿清聽。夏夜云夜靜，更欲闌。雨過苔猶濕，推窗看月明。誤引流螢入，向化鎮晚歸。云蒼茫雲水思依稀，乘醉歸來日已微。萬頃湖光兩岸白，滿江漁火作螢飛。斷句客愁流水寫，別恨落花知。家似曉星零落甚，人如秋草別離多。均佳。又亂峯遠插夕陽天，寫出涇邑山深谷邃景象。

胡伯春茂才

有恂

樸安之兄也。教讀課耕無意塵事，共和丁卯卒。年五

十三。著伯子詩集錄其幽居云：小小茅廬結構新，山爲屏障水爲鄰。獸因求食時窺戶，鳥解忘機漸狎人。兩扇柴門開闔便，一枝竹杖去來頻。

閒情好向閒中得莫處塵囂負此身

胡寄塵處士

懷琛

樸安之弟也以教授爲業共和丁丑冬卒年五十三

著有江村集錄其讀文道希先生遺詩云見說誦詩聞國政晚清作者抑何稀今人祇識黃公度我欲兼稱文道希杜律亂離皆史乘屈騷忠愛畏讒譏此編百讀應無厭僅謂工詩却又非

胡淦平女士

淵

樸安居士長女也少敏慧詩有家風畫則以古爲法尤

善山水著有南香

涇縣洞名

詩草畫語有題畫二首云淡日冷枯松微風響

疎竹古道寂無人輕寒透茅屋秋色澹幽亭泉聲振古木夕照散餘暉清光滿空谷女士適許靜仁第三子誠二載病逝年甫廿六有才無命可慨也樸安近以所刊樸學齋叢書見贈爲彙錄於此

望江余節高觀察

萊

乃湘撫壽平中丞

誠格

之冢嗣也中丞以詞名而

不多見君喜爲詩有和予看夏園紫白牡丹詩前四句云微醺風軟不嫌吹同認康橋布置宜檻畔餘寒春尙滯隴頭盛賞夢常羈蓋謂隴上牡丹極盛惜予壬子春早歸未及立夏花時也

廬江鮑叔方茂才

增

爲咸豐殉難扶九先生

雲鵬

之孫喜吟咏壯歲嘗

游熱河賦詩云行行此去熱河路避暑當年是帝居歸途云長途冰漸  
泮原路馬知還過遷安縣濟渡處見王彥章鐵槍遺蹟云鐵柱穿磐石  
蒼山夾亂流滄桑後里居贈典獄馮竹莊云無田思種德在野不言官  
均有思致

吾邑尙有數人能詩并錄於此徐孟彤大令

守 屏

嘗游伊犁有塞上草

宿古浪縣

州在涼

云策馬趨危磴盤旋入寨昏寒林屯雪鴿晚市出山豚

野老爭披褐

即羊毛所織布

荒城早閉門征途摧壯志悵望欲何言布隆吉薩

爾

過此即

云峽口初生草關中早送春離奇觀鬼物愴惻悔風塵野暗

鵬窺馬年荒鹿近人至今怨回紇城破點行頻二詩雄渾似岑嘉州章

竹生

秦笙

過彝陵郭景純爾雅臺云洗硯池荒剩綠苔夕陽影裏一徘徊

游仙絕調今沈寂弔古惟餘爾雅臺亂離行旅自多感慨竹生乃道

光己酉浙江主考璧田編修

瓊

之玄孫哲騫夢芙二君之猶子也郎仲

滌斷句云單衣六月涼如水一枕南窗聽雨聲殊有別致

予贈張祝三醫士詩云三世醫傳三折肱千秋金鑑舊家聲閒來愛譜

陽春曲擊笛柯亭作鳳鳴君爲滬上名醫驥雲先生之孫星若處士之



子三世皆善岐黃君亦嗜倚聲

涪陵文自怡

德銘

閱青鶴雜誌余所作詩話悅之寄詩稿來乞定錄其

涪州北巖紀遊云崖頂飛泉落山寒氣亦陰蠶叢餘古蹟蝸篆辨奇形  
洗墨黃山谷題詩朱考亭鉤玄留講學閒坐味義經又亭小圓如笠屏  
開翠嶂橫倒生蟠石樹俯瞰隔江城遠火荒山燒餘霞別浦明高風懷  
范守此地勸農耕雋永似姚合蓬州舟中云左遷能識民間苦顏魯公  
曾作此官寄語而今當道者古人風節著艱難此作無異香山新樂府  
攸縣龍毅甫吏部徽年乃芝生少司寇湛霖冢嗣己未庚申間余遇之  
於滬君遣其賢子毓琨來問業余曾題其南北史小樂府云延壽當年  
擅史才平亭南北掇寒灰漁洋早學音聲佛又見黃金鑄蠡來君旋歸  
長沙以毓琨負才早逝憂傷成疾壬申卒年五十許遺稿未梓余擬搜  
輯刊于詩話續編毓琨字伯石年十五來從余學詩風神似衛叔寶言  
論似王輔嗣嘗有句云夢遠情猶在花飛態自妍雲輕莫逐晴時月風  
厲猶憐落後花意致淒婉歸湘後癸亥花朝病逝年甫弱冠予哭以詩  
有作草宗王令摘辭仿晉書之句紀實也

合肥李問泌

國樞

詩人庚餘丈仲子也年逾冠有目疾而喜閱書同居

滬來從學嘗游西湖有魚避中流樵雲垂列岫鬟之句予極賞之乙丑  
上元多食湯圓致發紅疹西人謂爲紅痧入醫院三日而逝年甫廿六  
性極淳厚勛學甚猛可傷也予後閱成同間廬郡儒醫黃二山

承谷所

撰藥性論謂此症粵人謂爲發痧乃胃熱極曾以梨汁飲之兼旬愈但  
忌米飲耳

女米則牙林黑

并著於此以告來者

莊呂塵有庚辰中秋夕詩云擊鮮沽酒鄰家侈薄餅清糜稚子歡佳節  
本來非我事小盤久已誤儒冠

小盤足吳志步騰傳

善寫幽懷自成佳句

宛醒吾近賦秋齋閒興詩云哦詩未已月初上招鶴不來雲欲還又多  
情相對是秋山章夢芙和其山字韻云紅樹斜陽郭外山余亦和云去  
垣留得一房山

時廬城已墮

三押山字皆有別趣

古人警句如江瑤鮮荔雋而彌永殊耐人思近人則諸眞長之茗坐今  
爲傭保重笙歌誰解亂離曾李拔可之盈盈月上初生水款款花飛不  
定風劉錫之丈之十里繁華絲步障三生惆悵玉搔頭黃松客之芙蓉  
春水曲江曲楊柳大堤三月三鄭質菴之聽簫忽起城頭角看月微嫌

樹裏燈黃公渚之出牆人語墮烟外受月林光明露初皆可備學者潛思深玩效法步趨或問余曰君生平得意之作能一誦否余曰僕欲學

大歷十子苦未能至如梅訊正逢晴雨候魚書多在有無間故里一條

瓜蔓水遯荒千樹鷓鴣聲震澤波涵神禹蹟洞庭春駐翠華年雞犬桑

麻秦日月烟波風雪漢關津至公堂上三條燭獨樂園中百和香讀山陰孫

蓮士詩集追憶道光己酉吾鄉章壁田編修典試浙江獨閱試卷事總角龍文章智慧齊眉鵲案佛因緣

壽冒鶴亭暨德配黃恭人六秩歸鴻來燕易寒暑左江右湖資粥饘寄懷散原先生廬山閒雲飄

泊不成雨廢堞登臨共斷魂張次珊通政約游明故宮屢向空山求鷺鷥果然驚座

得麒麟問答李曉耘莊呂塵幻相宛陳鐘鐘虞似賜緋不畏雪霜欺詠花倉篆漢分

皇古味芳蘭白石楚騷心子挽程大筆陣精妍行我法詩城割據集鷗羣忍題

古樓集老子何妨化胡佛叔孫原是秉儀人宣送別劉一線春江詞客淚萬

山寒草故人墳贈吳雁舟詩句儼同花九錫用羅虬語意涼宵遙得月平分讀鶴亭墨

花詩賦寄當前好景須真賞臥後清思費苦吟寄許遲生世兄諸聯皆自謂稍可者

愚謂吟咏一道可以怡情可以引年僕則年躋耄耋矣昔人謂詩能淑

身淑世非虛言也學者宜效之



予之五言自以爲尚可者附錄於後贈袁伯夔云禮節能疎放文章偏  
老成贈曾重伯云珠懸城不夜毫染玉爲田晉賢三語掾秦特百夫防

君端  
技擊

贈李孟符水部

岳瑞

云靈均蘭蕙歎臣甫杜鵑哀初夏何槃叟丈

枉過敝廬賦呈云世隨春已換州曰道彌光

文乃孫善書畫

壽吳倉石

丈云詩吟東野瘦人是古皇餘懷郝晉年明經

名喬齡

云呼吸餐朝氣

逍遙致大年挽丁叔雅云無家寒食客有夢故園扉挽宋燕生云微櫻

元晏疾孤抱仲長書

君著有卑  
議四卷

挽張弢樓丈云安石爲諸舅浮邱是本

師挽沈濤園中丞云獨儲左傳癖早被伏波名

公嘗爲金陵水  
師學堂總辦

余伯陶

約游南翔云萬鴉啼宿雨一水抱孤村巢園云石梁橫澗窄瀑布挂山

明隴上伏日作云土風猶被褐

即毛布以羊毛織成有粗細二種  
粗者可以禦寒細者可以祛暑

盛夏

不聞蟬述懷云斷蓬成汎汎飛鳥對閒閒聖狂爭寤寐物我與周旋

偶書詩話後一律云文學根株未渺茫每思舊業繼輝光星轍卓越留

佳識

先太高祖對池太史公嘗持友人吳元桂所輯昭代詩鈔座主  
新建葉治齋閣學一棟作序葉公序中有談及近今詩學陳子言

云云此乾隆年間事葉公乃甲子江南副主考也

碑薛聯縣發異香多難干將資礪石晚成詩

卷在江鄉才非康世何須仕名壽眉公幸頡頏庚辰冬七七叟鶴柴記

尊瓠室詩話補

鶴柴山人陳詩撰

辛巳仲春冒鶴亭檢篋得余己卯初春所作轉軸篇再和一首見贈云  
前年枉詩在懷袖君今七八我六九論交三世逾百年少壯過從到白  
首喜君著作盈緗縑晚知倒蔗差味甜小邦邾莒競自大輩行絕逸誰  
先髯余答和云昔我卅八君廿九相逢吳市酌大斗小三吾是霍嫫姚  
君著有三吾亭集也如黃絹論齋曰一序真當直萬縑五羊述舊筆花纖  
君爲拙撰

據語集作序且

於今耄耄藏人海又見斜川

謂孝魯世兄

侍子瞻

常熟錢仲聯

萼孫

一號夢苕乃翁文恭相國之戚文學六朝詩近玉溪

一派與余曾相識近於友人處見其過蘇州一首云重見江南柳色黃  
奔車載夢過金閭難忘舊館眠秋雨何意蕪城換夕陽劫後亂峯成抑  
鬱鴉邊一塔寫荒涼縱然吳語相溫好爲是前塵總斷腸此作似韋莊  
亂後詩語意淒清耐人尋味

陳知白居士

榆蔭

乃介菴太史冢嗣爲逸夫之尊人今年五十有二昔

嘗隨宦武昌府廨近由望江避亂歷贛湘兩粵而至滬出示近稿錄其

戊寅秋車中望衡岳云火德南疆耀祝融千秋祀典列崇封流亡不許  
閒登眺一樣匆匆負岱宗要言不煩情景俱到斷句如客夢遠隨江上

月天心教看嶺南花

桂林重九

相沿漢臘人猶守漸染歐風禮各殊

己卯除夕滬濱

祭家

途窮人比離羣雁物貴錢如赴壑蛇善寫滬上近狀

漢川徐澄宇

英

與德配甯鄉陳秀園女士

家慶

曩在滬教授曾相識甲

戌偕應聘至安慶大學爲文學教習凡四年乃避亂之湘中茲錄澄宇  
苦雨詩云苦雨沈沈晝掩扉蕩胸奇氣忽成圍文章久作江湖客十二  
樓高未忍歸秀園憶滬濱半沁園詩云臨水結茅茨垂楊蘸鬢絲小山  
堪入畫幽徑可尋詩茗坐忘時久清談待月遲西風吹落葉別後苦沉  
思以見一斑澄宇尤工文秀園亦善詞有贈予秋霽詞云商飈正緊一  
葉西風一笛秋聲吟興未寂頗近清照

旌德呂仲素女士

美蓀

乃端田學使

鳳岐

次女善詩文羈居青島曾刻

先德靜然齋筆記有得鶴柴世文書次韻奉酬云來向營邱老閨中一  
草衣山川倦游覽詩禮念庭闈歌罷傷薇落天寒無竹依仁風期有勗

莫使玉音稀



嘉興金錢孫孝廉

兆著

乃乾隆丙辰狀元檜門都憲

德瑛

之六世孫續

學工文共和初載曾預修清史既南歸羈滬頻年與南通徐貫恂有姻戚癸酉冬余得徐介紹相識追憶昔年先太高祖對池太史公爲給諫時荷都憲公保薦京察情猶師生迨明年京察一等外簡常鎮通道而都憲公已歸道山不及見矣細敘世誼余與君固昆弟行也君善詩詞堅凝溫雅如其人近復邂逅於友人座中猶矍鑠如舊著述不衰茲錄其丙辰行壽永順從兄甸丞太守六十句云我兄覽揆在此歲先公初得六葉孫孔佛抱送讖佳朕玉雪交映光清門又云科目最重舉進士退就郎署弢聲聞仕宦已至直樞密願乞外吏辭要津郴山高高去天尺資水千里波清淪右臨六詔左五嶺風氣不到民猶馴出爲三州踐昔夢志除害馬蘇疲鱗周官尙廉屢報政漢吏奉法方名循忽然掉頭起投効竟歸不借鱸與莼又燭影搖紅詞序曰江亭修禊分韻賦詩趙次珊館長獨爲詞余亦和作仍用所分翠字韻詞云城郭參差臘寒不放韶光起佇天尺五重三蕭瑟猶如此人說王家故事侍者賢洛英借撥隱囊紗帽流水游龍羣賢畢至檻外平原柳萸暗斂東風細朝來

爽氣撲簷楹山色沈空翠誰道春來久矣問元都花開尚未俊游申約  
策蹇重看蘆芽垂水余亦有贈君詩云吾祖乾隆世榮叨都憲誇同升  
類公叔故事話通家喜接詞章彥還廣棠棣華

暫兄甸丞太守名蓉鏡乃己丑進士子曩相遇

于漚以其與都憲公異籍未問家世旋聞捐館年逾古稀

澎湖

即駕鵲湖

舊曾至蔣徑未應遐

廣州潘若海主政

博

麥孺博孝廉

孟華

皆康南海先生門人負政治文

學才滄桑後相繼謝世年未五十也粵人刊其詩詞南海命名曰粵兩  
生集若海尤善辭令嘗說桂督陸榮廷出兵討袁袁亟去帝號若海之  
力也旋以積勞卒有泊秋風江詩何意秋風江著此秋風客秋風偏有  
情吹我孤舟泊二十字抵人千百又有贈余句云安貧古人節茹苦志  
士心又云茲事幾人工前修百輩盡獨于百世下寒灰撥微燼孺博乃  
羅癭公從甥有和揆舅除夕句萬事蒼茫墮烟莽一官俯仰得飢寒

述往篇一首再題詩話後云霜田飢雁感飛鸞桑下看經在故園薄質

長貧傷魯鈍名師

謂寶竹坡宗伯

如遇接淵源延陵厚澤終身戴

庚子秋吳北山師攜余至

信國知音曠世喧

文芸閣學士見拙詩首先稱賞

皖雅一編能得就更將閒話伴清

尊

